


# FUNGÓLA YA EKUKE

 Litómba ya kozala na tabernacle! Ekánamaki mpenza te, mpo na ngai mpe. Ngai, lokola nayebaki ete mpokwa ya lelo ezalaki mpokwa ya elambo, nalingaka ntango nyonso koya na elambo, soki nazali zinga-zinga esika wana. Mpamba te ezali . . . Nakanisi ete Baklisto nyonso basengeli komilengela mpo na kolia elámbo, mpo Yesu alobaki: “Soki olei yango te, ozali kosangana ná Ngai te.” Yango wana, ezalaka . . . ntango nyonso litomba monene ko—koya na tabernacle. Na bongo, na mpokwa oyo, Ndeko Neville alobaki ete mongongo na ye ezali mpenza malamau te, mpe—mpe asepelaki ete ngai náloba na eyanganelo na biso. Nayebisaki ye ete nakosepela kosala yango. Nalingi mpe koyebisa ete soki . . .

<sup>2</sup> Lobi na mpokwa ezali liyangani ya mibali, bayángeli-misoló, lobi na mpokwa, ná bato na mombongo ya losambo oyo, ezali liyangani na bango ya momesano, ya mokolo ya Lendí na mpokwa mpe . . . basengeli kozua mokano moko elongo ná motongi-ndako. Nabanzi ete bino nyonso bozali kososola ete mi—mi—mikanda na biso endimamaki, mpe tokoki kotonga ndako-a-nzambe. Na boye endimami, mpe tokoki kobanda na mpóso oyo. Ndakonzambe ekobanda na mpóso oyo, na boyebi na ngai. Baboyaki kopesa biso ndingisa yango, awa na Jeffersonville. Kasi tokendeki na Indianapolis, na etúka, mpe bapesi biso ndingisa, boye, tolingi kotonga yango. Na bongo, ekobanda, ntango mosusu, na mpóso oyo. Ekoyebana nsima na liyangani lobi na mpokwa. Na bongo nsima na liyangani lobi na mpokwa, soki babandi na mpóso oyo te, soki likambo moko esalemi, soki motongi-ndako akoki kobanda na mpóso oyo te, boye akobanda na mpóso ekolanda.

<sup>3</sup> Mpe nsuka ya mpóso oyo ezoya, mokolo ya Mpóso na mpokwa, ya Lomingo na ntongo mpe Lomingo na mpokwa, ya mpóso ekolanda, mokolo ya mpóso ná ya lomingo oyo ekolanda, soki Nkolo alingi, nalingi lisusu kosala ma—ma—mayangani misato ya kolandana, ndenge tosalaki eleki mwa bampóso. Na bongo, nsima na biso ko . . . Ekozala mokolo ya Mpóso na mpokwa, na nsima na Lomingo na ntongo mpe lisusu Lomingo na mpokwa. Na oyo ekolanda, ekozala mokolo mwa zomi na misato mpe zomi na minei ya sanza oyo.

<sup>4</sup> Na nsima, ngai ná bandeko mosusu tokokende na Colorado, nsima na ntango yango, na mobembo ya bokila, bongo nde tokozonga. Soki tabernacle, ntango ekosila, soki ezali mokano ya Nkolo, nalingi kozua, ntango mosusu, mpóso mobimba ya mayangani, liboso nábima lisusu, na ntina na *Bilembo Nsambo* ya Emoniseli. Liboso mpenza na . . . Ndenge tosalaki mpo na

*Bileko Nsambo Ya Lingomba*, sikawa ekozala *Bilembo Nsambo* kolanda Yango.

<sup>5</sup> Mpe ntango mosusu na pene na bampóso mibale to misato oyo ekolanda, mpamba te nakanisi kokokana na maloba na bango, ná bato oyo bakosala mosala yango, bakoki, tokoki kotonga tabernacle mpe kosilisa yango nsima na mikolo pene na zomi, to zomi na mitano, eloko moko ya ndenge wana. Na ntango yango, tokokóma na makoki ya kofandisa bato oyo toyambaka awa pene na mbala mibale to misato, ntango mosusu koleka. Yango wana nazalaki kozela kino na ntango yango.

<sup>6</sup> Mpamba te, mokolo ya Mpóso ná ya Lomingo oyo eleki, ezalaki nsómo, boyebi. Bato bazalaki kotelema awa na ngonga ya mibale na nsima ya nzanga, mpo na kotóndisa tabernacle, liboso kútu ndako-a-nzambe éfungwama. Na ntongo oyo elandaki, na ngonga ya mitano, infirmière moko afandaka na lopango oyo elandi oyo ya ngai, autaki kuna, alobaki: “Bato batóndaki zingazinga na tabernacle mobimba, na ngonga ya mitano ya ntongo.” Boye, na bongo bato, ntango bakótaka, bisika etikalaka lisusu te, balembaka nzoto mpe bakendeke na bango. Na—na bongo baoyo batelemaka, bafinanaka mpe batóndaka na banzela ya kati, bayókaka nkaká na makolo, ná nyonso wana. Mpe namonaka basi kotelema wana, kotoka, boyebi, ndenge wana, mpe motoki yango ékokitaka bango na nzoto. Mpe mobali moko akotelema mpe akopesa esika na ye na mwasi moko; na bongo ye moko akotelema, kino makolo na ye ekóbanda kosala mpasi, mpe moto mosusu akopesa ye esika. Boyebi, mpe bongo na bongo, epesaka mawa, mpe bamama ná bana oyo bazali na bokono mpe bongo na bongo, ezalaka mpasi mpenza.

<sup>7</sup> Boye, tozali koluka kosilisa yango sikawa, na kotongáká tabernacle ya monene koleka. Mpe tokozala na esikamoko kitoko epai epai oyo bana, mbala mosusu. . . mpe bakataka biso, ndakisa, ntango bana mike balelaka; ee, tokozala na eteni moko ya ndako mpo na yango, mpo bamama bákoka kokóta kuna, kasi bákoba komona liyangani, mpe koyoka wana bazali kuna na kati. Tokozala mpe na biteni ya ndako mpo na Eteyelo ya Lomingo mpe nyonso wana ekolandana na ndenge esengeli. Mpe, nyonso wana, soki Nkolo alingi, ekosalema, kobanda mpóso oyo ekoya.

<sup>8</sup> Bino nyonso bo votaki yango mokama likoló na mokama, boye totingami na oyo, bomoni. Lingomba nde ezali na bokonzi. Oyo lingomba elobi, ezali yango nde. Bayángeli-misolo, to moto mosusu te. . . Bayangeli-misolo, moko na moko na bango, akoki ko-voté kaka mbala moko. Mokengeli akoki ko-voté kaka mbala moko. Ezali lingomba nde, yango nde—nde ezali démocratie ya lingomba, bokonzi ya lingomba. Lingomba, na mobimba, nde elobaka. Esili wana. Mpe tosepelaka na yango, mpo tozali na ba-evéke te, bakonzi te, ba-sinzili te, to eloko moko te, mpo na koyebisa biso oyo, wana to oyo *mosusu*. Molimo Mosanto kati

na lingomba nde alobaka. Nasepelaka na kotambwisama yango, mpe ezali malamumu mingi.

<sup>9</sup> Mpe natunaki boye: “Bino nyonso bolingaki ete tózela kino tokozua makoki esengeli mpo na kosalisa misala na tabernacle mpe kotonga losambo ya monene?” Ezalaki na likita ya bayángeli misolo, kasi bayángeli misolo bakokaki kokata likambo yango te. Na bongo, batunaki ngai, lokola sinzili mokonzi, ete náya kotuna lingomba. Boye nalobaki: “Sikawa tozali na misolo ya kokoka mpo na koyeisa losambo monene mpe kobongisa yango ndenge mosusu mpenza, ná nyonso wana, koleka oyo tozalaki na yango.” Nalobaki: “Sikawa tokoki kosala yango sika-sikawa, to kobomba misolo na biso kino ntango tokokóma na mbongo oyo ekoki mpo na kotonga losambo ya sika, esika mosusu.”

<sup>10</sup> Mpe tosalaki vote mpo na yango na losambo, mpe biso nyonso mpenza tovootáki mpo na “kotonga losambo sika-sikawa, mpe kotonga mpenza losambo ya monene koleka sika-sikawa”. Mpe totikalaki na likambo yango mpenza.

<sup>11</sup> Mpe likita oyo awa ya engumba ya Jeffersonville babóyaki kopesa biso ndingisa, balobaki ete tokokaki kosala yango te. Mpe tokendeki koleka yango, tokendeki na Indianapolis mpe tokotisaki Etúka na likambo yango. Na bongo bazongisaki maloba, ete “bósala yango,” tozui ndingisa ya kotonga yango. Na bongo engumba ezali lisusu na eloko moko te ya kosala na yango sikawa, ekómi likambo ya Etúka. Boye tozui ndingisa, mpe motongi azali na—na mokanda ya ndingisa yango na loboko na ye sikawa, mpe nabanzi ete babelemi mpo na kobanda na ntango nyonso.

<sup>12</sup> Lobi na mpokwa, soki mo—soki motongi alobi ete alingi kobanda na mpóso ekoya, boye nakosala mayangani te mpo na . . . kino ntango tokoya mpo na *Bilembo Nsambo*. Na bongo, soki motongi akoki kobanda te na mpóso ekoya, na bongo, mokolo ya Lomingo oyo ekoya, mokolo ya Mpóso ná ya Lomingo, nakosala mayangani liboso ya kokende.

<sup>13</sup> Mpe nalingaki kosala yango mokolo ya Lomingo oyo, kasi namonaki ete na mpokwa oyo, lokola ezali mpokwa ya elambo, na bongo, nasali yango te na Lomingo ya lelo. Mpamba te, ná bato ebele boye, tokoki kolia elambo na kimia te, kasi ntango tokozua losambo ya monene koleka, tokokoka kosala yango.

<sup>14</sup> Sikawa, tozali kozela President oyo akoya. Mo . . . oh, boyebi oyo nalingi koloba, auti kobotama na libota Hickerson kala mingi te. Mpe ndeko na biso ya mwasi oyo azali mobeti piano, soki akolinga koya kotindela biso mwa loyembo yango, ya “Bómema Bango,” soki olingi, to mwa loyembo moko ya lolenge wana. Elenge mobali kitoko oyo, na libota Hickerson, bazelaki ye ntango molai, asili koya. Mwa mwana mobali kitoko mpenza, na ntembe te, azali paúni mpo na ba-Hickerson. Bango nyonso

bazalaka ba-paúni mpo na biso, tolingaka bango mpe bazali mpenza bandeko na biso ya mobali ná ya mwasi. Tozongisi matondi mpo na mbotama ya mwana oyo na libota na bango, yango ememi mpenza mbóngwana na libota yango. Mpe soki bango, tata ná mama bakoki koyá ná mwana yango sikawa mpo na kobulisama. Sikawa, Makomi elobi: “Bamemélaki Ye bana, bana mike, mpo Ákoka kotia loboko na Ye likoló na bango mpe kopambola bango.”

<sup>15</sup> Sikawa, bato mosusu na mokili bandimaka oyo babengaka “libatisi ya bana mike”. Mpe, elingi koloba, bazuaka mwa bana mike yango mpe babátisaka bango ata moko te, mpo, bamwángisaka mai likoló na bango. Sikawa, tomoni likambo yango esika moko te na Biblia, epai oyo bamwángiselaki mikoló mai, to bana mike.

<sup>16</sup> Na boye libatisi ezali litatoli ete mosala moko ya ngolu esili kosálema na kati. Kasi bana mike bazalaka na boyebi ya lisumu te. Na yango, ntango Yesu akufaki na ekulusu, Akufaki mpo na kolongola lisumu ya mokili. Mpe ntango bebé akómi moto, mpe abotami na mokili oyo, bazalaka na lisumu na bango moko te, na yango bazalaka na ntina ya kobóngola motema te. Kasi, na ntango wana, Makila na Yesu Klisto nde elongolaka lisumu yango. Na ntembe te, bebé yango abotami na lisumu, asalemi na lisumu ya nko, ayei na mokili ná lokuta na monoko, mpe bazali basumuki na lolenge yango, kasi Makila na Yesu Klisto elongolaka yango. Kasi ntango mwana yango akómi na mibu ya kosósola makambo, mpe ayebi malamú ná mabe, na ntango wana, asengeli kobóngola motema na oyo asalaki. Lisumu na ye sikawa, ezali lisumu, kaka ndenge abotami na lisumu, ezali lisumu ya bato, lisumu yango ezali lisumu oyo Adama ná Eva basalaki; kasi Nzambe alongolaki yango, na nzela ya Makila na Yesu Klisto. Sikawa, bebé yango azali na lisumu ya koyambola te kino ásúmuka, bongo nde asengeli kobongola motema. Bomoni? Mpe ntango abongoli motema, na ntango yango nde asengeli kobatisama, na bongo akobátisama na kozindisama na mai.

<sup>17</sup> Liboso na ntango yango, biso tolandaka malako ya Biblia, ete: “Bamemelaki Yesu bana mike, mpo Ákoka kotia maboko na Ye likoló na bango mpe kopambola bango.” Moboti kitoko oyo, na mpokwa oyo, amemi bebé oyo epai ya mokengeli ná ngai, mpo na kobulisama. Mpe bamoni ete ndenge batii ye na maboko ya baoyo bazali kotalisa Klisto, batii ye na maboko ya Klisto. Boye, na kondima, tomemi bebé yango epai na Nzambe, mpo na kopesa matondi ndenge Atindi ye awa, mpe tosengi na Nzambe ápambola ye, yango nde tobéngaka “kobulisa bana mike”.

<sup>18</sup> Sikawa, boyebi ndenge nalingaka kosala mpo na bana na ngai moko. Nazali na mwana moko ya mwasi na Nkembo na mpokwa oyo, mpe abulisamaki na Nkolo, awa na etumbelo. Nazali na mwana moko ya mobali ná mwana moko ya mwasi, bafandi kuna, na mpokwa oyo, babátisami naino te. Moko azali

na mibu zomi na moko, nazalaki kosolola na ye na ntina na yango lelo, Sara, mpo na libatisi. Mpe Joseph azali kaka na mibu nsambo, boye, azali naino moke mingi mpo na yango, kino ntango . . . Soki ayoki mposa na yango, mpe alobi ete Nzambe nde atii yango na motema na ye, nakosala yango na ntango wana. Kasi, lokola bana mike, nabulisaka bango kaka epai na Nkolo, mpo yango nde Makomi elakisi.

<sup>19</sup> Ndeko Neville, soki okoki kopusana elongo na ngai sikawa mpo na mwana mobali kitoko oyo. Nazalaki kobanga . . . Oyo wana Hollin? Hollin? Iyo, Hollin, Moke. Stephen Hollin. Ee, malamu mpenza. Oh, nakanisaki ete azalaki kolala. Yango nde lolenge ya ba-Hickerson, soki likambo moko ezali kosalema. Namonaki ye mokolo mosusu wana, nalobaki “Président,” mpe bongo na bongo. Mpe, na ntembe te, wana ezalaki moke mingi mpo na ye, bomoni, kolobela ye lokola “Président.” Nsango nini? Ee, nayebi ete esengeli kozala libula mpo na mama nyonso ya bulee. Bokanisi bongo te? Kitoko mingi. Sikawa, Ndeko Hickerson ná Ndeko mwasi Hickerson, lokola mosali ya Klisto, lokola mokengeli na bino, nazui bebé oyo, na kondima, napesi ye na maboko ya Yesu Klisto, kati na maboko na Ye Oyo bino bolingi kotia ye.

<sup>20</sup> Togumba mito, wana ngai ná mokengeli totelemi awa, ná maboko totii likoló na bebé.

<sup>21</sup> Tata na biso na Likoló, kati na Biblia, bamemelaki Yo bana mike, mpo Ókoka kotiela bango maboko mpe Ópambola bango. Mpe na bosolo, Nkolo, bapámbolamaki. Sikawa, mpo na kolanda ndakisa na Yo, makambo oyo Yo osálaki, tomekaka na bokebi nyonso, Nkolo, kotánga Biblia mpe kolanda ndakisa yango mpenza ndenge Yo osalaki. Mpe tata ná mama oyo, Ndeko mobali ná Ndeko mwasi Hickerson, bayekoli na biso ya bolingo awa na tabernacle, bamemeli biso bebé oyo, libonza ya esengo oyo Otii na maboko na bango. Auti na Yo, Nkolo. Yo nde opesaki bango mwana oyo. Sikawa bazali na mposa ya kopesa Yo mwa bomoi na ye, mpo na kosalela Yo. Nabondeli ete Ópambola mwana oyo, ete Ópesa ye bomoi molai. Tika ete ázala na bomoi, soki ekokoka, mpo na komona Boyei na Nkolo. Nabondeli ete Ópambola ye na bisika nyonso oyo akozala. Tika ete ábókolama na libota ya Baklisto, ndenge abótami na libota oyo. Mpe tika ete ákoba na ndako oyo. Tika ete tata ná mama bázala na bomoi mpo bámona mwana yango na eteyelo, soki ekokoka, koteyáká Nsango-malamu. Bakosepela komona ye ndenge wana, Tata, koleka kozala na—na ngwende ya Maison Blanche, to esika mosusu nyonso, mpo bazali basali na Yo, mpe bazali na mposa mpenza ete bomoi ya bebé yango ézala ya komipesa mpe ya lipamboli na mosala ya Nzambe.

<sup>22</sup> Sikawa nabondeli, Tata, ete Ópambola mwana yango. Mpe tika ete ngolu ya Nzambe ékita likoló na ye, mpe tika ete ázala na nzoto kolongonu ná esengo na bomoi na ye mobimba. Mpe tika

ete tata ná mama na ye bázala na bomoi mpo bámona ye akóli, tosenji yango lisusu. Pambola ye oyo topamboli na Nkombo na Yo.

<sup>23</sup> Sikawa, bebé Stephen Hollin Hickerson, napesi yo epai na Yesu Klisto, mpo mapamboli oyo tosenji ékoka kókita likoló na yo. Zalá na nzoto kolóngonu mpe makasi, ndenge ngai moke ya mobali, mpe tika ete ózala na bomoi mpo na nkembo na Nzambe. Na Nkombo na Yesu Klisto nde tosenji yango. Amen.

Nzambe ápambola bino. Nzambe ápambola bino nyonso. Bebé kitoko mpenza.

Epai tokokóma mibange ata moke te,  
tokokóma mibange ata moke te,  
Na Mboka oyo tokokóma mibange ata moke te;  
Tokokóma mibange ata moke te, tokokóma  
mibange ata moke te,  
Na Mboka oyo tokokóma mibange ata moke te.

<sup>24</sup> Ekozala kitoko mingi, boye te? Bilengé bakokóma mikólo, mpe mibange bakokóma bilengé. Sikawa, ezali kitoko mingi, boye te? Mpe tokozala na bokono ata moke te, to tokozala na mawa ata moke te, to tokokufa ata moke te.

<sup>25</sup> Sikawa, Ndeke Neville asili kopesa mayebisi ya mayangani. Sikawa nalingi mpe koyebisa ete liyangani yango, bóbosana yango te, mayangani oyo auti kolobela. Lisusu, Mme Ford oyo azaláká koya na losambo eleki mibu ebele, nauti komema ye epai ya mwana na ye ya mwasi, eleki mikolo moke, akómaki na mibu ntuku mwambe, mpe akendeki kokutana ná Nkolo lobi na mpokwa na ngonga ya mwambe, nakanisi. Mpe ngai ná mokengeli nde tokokamba matánga na ye, na esika ya matánga ya Coots, Mokolo ya Misato, na ngonga ya zomi na—na ndambo, mokolo ya Misato oyo. Mme Ford, Mme . . . Nakanisi ete nabósani nkombo na ye ya . . . Levi, Mme Levi Ford. Ya biso . . . Azali—azali mama ya Lloyd Ford oyo nalobeli na buku na ngai, ete alingaki kobómbela ngai elamba ya Bana Scout wana, kasi nazuaki kaka lokolo moko oyo etikalaki. Sikawa, oyo—oyo wana azali mama ya elenge mobali yango. Boye, ngai moto namemaki ye kuna, mokolo wana, mpe nabóndelaki ná ye elongo, mama mobange yango. Mpe akendeki kokutana ná Nkolo Yesu.

<sup>26</sup> Sikawa, soki Nkolo alingi, nazalaki na eloko moko awa oyo nakoki koyebisa na ntina na mayangani, soki ekosalema na mpóso oyo ekoya, natiaki yango awa na kati, to nakanisaki nde ete natiaki yango, na ntina na oyo nakolobela mpo na—na—na liyangani, liyangani oyo ezali koya na mpóso oyo ekolanda. Soki na—nakanisi. . . nakanisaki ete natiaki yango na kati ya buku oyo, nayebi te soki nasalaki yango to te. Iyo, yango oyo. Soki Nkolo alingi, mokolo ya mpóso na mpokwa nalingi koteya likoló na “Mpo na nini moto moko abendaka bomoi ya moto mosusu.” Mpe mokolo ya Lomingo na ntongo nalingi koteya likoló na

“Kotia libánga ya motó likoló na pyramide”. Mpe mokolo ya Lomingo na mpokwa nalingi koteya likoló na *Mokambi na Ngai*, motó ya liteya, *Mokambi na Ngai*, mokolo ya Lomingo oyo ekoya na mpokwa. Sikawa, Nkolo ápambola makambo yango mpe ásungá ngai, mpo nazalaki awa te, mpe nazali na mwa makambo mpo na kolobela yango.

<sup>27</sup> Sikawa na mpokwa oyo, tolingi kosala nokinoki mpe kozua mwa makambo. Kútu, nazali na mokanda moko awa oyo—oyo euti koya na boite postal, Billy moto azuaki yango eleki mwa ngonga, ete bandeko moko bazali na Michigan, mpe mokanda yango euti na lisanga ya batei, bazali na makambo mingi. Yango nde makambo yango ebótaka mobulu, bomoni. Bazali koloba na mokanda yango ete ezali na bandeko moko kuna oyo balobaki ete ngai moto natíndaki bango kuna, mpe bazali koteya ete mibali basengeli kotika basi na bango mpe koluka balingami na bango ya molimo, mpe ete—ete ngai namikósaka ata moke te. Ete eloko moko te. . . Ná, oh, makambo mosusu ya nsomo oyo boyóká naino te. Lisanga ya batei yango bazuaki likambo yango, mpe bakomeli ngai mokanda na ntina na yango, ete ngai moto natíndaki bango kuna, mpe ezali kobota mobulu mingi. Mpe bamosusu na bango bazalaki kosakola mpe koloba ete mobali songolo asengeli kotika mwasi *oyo* mpe kokende kobala oyo *wana*. Sikawa, losambo oyo eyebi ete biso tondimaka bozoba ya lolenge wana te.

<sup>28</sup> Bisu tondimelaka Biblia. Tondimaka ete ntango mobali abáli mwasi, ye azali mwasi na ye, mpe bobele liwa nde ekoki kokabola bango. Ezali kaka yango. Bisu tondimaka makambo ya ndenge wana te. Tondimelaka mpe bolingo ya ofele te. Tondimaka makambo wana te. Tondimaka Biblia mpenza-mpenza, mpe bobele Yango. Boye, nakosala photocopie na yango, copie ya mokanda yango, mpe nakopesa eyano na ngai mpo na yango, mpe nakotia yango na ba-zulunále, mpe yango nde eko—ekokata likambo yango. Nabanzi mpenza ete ekoyangola bango, ata bongo.

<sup>29</sup> Sikawa na mpokwa oyo, liboso tófungola Makomi, tósolola na Nkolo na biso.

<sup>30</sup> Tata na biso na Likoló, tozali kobeleva na Ngwende na Yo ya mawa, na Nkombo na Nkolo Yesu, Moto monene Oyo akitaki uta na Nkembo mpo na komonisa biso bozui ya libúlá ya Nzambe. Totondi Yo mingi mpo na Yesu monene Oyo azalaki kotalisama ya Nzambe, oyo apesamaki na moko na moko na biso, mpe na nzela na Ye, biso tozui lisiko na masumu na biso. Tosili kolongwa na kufa mpe koingela na Bomoi, mpo biso tondimeli Ye. Mpamba te, ekomami na ntina na Ye, ete Alobaki: “Ye oyo akoyoka Maloba na Ngai mpe akondimela Ye oyo atíndaki Ngai, azali na Bomoi ya seko; mpe akoleka na kosambisama te, kasi asili kolongwa na kufa mpe koingela na Bomoi.”

<sup>31</sup> Pámbole Maloba na Yo, na mpokwa oyo, Nkolo. Mpe toyeyi

awa mpo na kolia elámbo, kala mingi te. Baklisto, bana-mboka ya Bokonzi bakoyangana zinga-zinga na bitumbelo, mpe kuna, bakolia oyo tobengaka “elambo,” e—eteni moke ya—ya molúlu oyo Otikelaki biso, mpo na kotalisa ete biso tondimaka ete Yo okufaki mpo na masumu na biso, mpe osekwaki mokolo ya misato, mpe ozali na bomoi mpo na libela, mpe biso tokosala yango kino Okozonga, kokokana na motindo oyo tozui na Makomi. Búlisa mitema na biso na makanisi mabe mpe na nyonso oyo tosálaki, oyo ekesanaki na mokano na Yo ya monene. Tata, límbisa biso, mpe pésa biso ngolu na Yo na mpokwa oyo. Búkela biso sikawa Lipa ya Bomoi, kati na Liloba, wana tozali kotánga Yango mpe kolobela Yango. Na Nkombo na Nkolo Yesu nde tosengi yango. Amen.

<sup>32</sup> Sikawa na Buku ya Emoniseli, kobanda na, molongo moko kaka, nalingi kotánga molongo ya 20, to molongo ya 1 ya mokapo ya 20.

*Namonaki mwanje kokita longwa na likoló, azalaki na fungóla ya libulu bozindo, ná monyolólo monene na loboko na ye.*

<sup>33</sup> Sikawa nalingi koloba, soki ekosalema, soki nasengeli kobenga yango motó ya liteya, uta na yango, to kobimisa ndimbola uta na makomá oyo, na miníti ntuku mibale to ntuku mibale na mitano oyo ekolanda, nakolinga kobenga yango, *Fungóla Ya Ekuke*. Sikawa, nalingi te ko—kobenga yango “bafungóla,” mpo Petelo bapesaki ye “bafungóla ya Bokonzi”. Kasi nalingi kobenga yango: *Fungóla Ya Ekuke*. Na bongo, na mbala moko nsima na oyo, nakolinga kobakisa mwa maloba na ntina na elambo, liboso tólia yango na mpokwa oyo.

<sup>34</sup> Sikawa, fungóla. Namoni awa, ntango totáangi, ete Mwanje oyo akitaki longwa na Likoló, azalaki na fungóla na loboko na ye. Nabanzi ete na Emoniseli 13 to 19 nde tomoni lisusu, Mwanje mosusu oyo ayei ná fungóla. Mpe fungóla ezali, ntina ya fungóla, ezali mpo na kofungola eloko moko, eloko oyo ezalaki ya kokangama, to eloko oyo esengelaki kozala ya kokangama. Kasi fungóla epésamá na ntina wana.

<sup>35</sup> Sikawa, bafungóla ezalaka ya ndenge na ndenge, mpo tosálelaka yango na makambo ya ndenge na ndenge. Ezalaka na bafungóla mpo na bibómbelo. Fungóla mpo na ndako na yo moko ezalaka, fungóla mpo na motuka na yo ezalaka. Mpe tobéngaka yango bafungóla, mpe ezali bafungóla. Mpe, mbala mingi, bakoki kosala bafungóla mosusu uta na fungóla moko. To mpo na ndako, mbala mosusu, bakoki kosala oyo tobengaka fungóla passe-partout. Na elobeli mosusu, ezali fungóla oyo, tóloba, esalémá ná basóngé, oyo ebalolaka yango, oyo eningisaka kúmba na lolenge moko boye, mpe ekoki, tóloba, kofungola ekuke nyonso, babéngaka yango “fungóla passe-partout.” Ezali na lolenge moko ya kolóngobana na bafungóla mingi, mpe ekoki



kofungolama na lolenge wana, bandako na biso, ata mpe mituka na biso, bakoki kosala mosusu uta na yango. Lisusu, ezali na . . .

<sup>36</sup> Fungóla moko te ekoki kofungola ekuke moko te soki esimbami na loboko moko te. Esengeli kozala na eloko moko esengeli mpo na kosalela fungóla yango. Fungóla na yango moko ekoki komisalela te. Esengeli kozala na eloko moko mpo na kosalela fungóla yango.

<sup>37</sup> Ezali lokola micro oyo na—oyo nazali koloba na nzela na yango. Micro yango elobaka te. Soki eloko moko te elobi na nzela na yango, ekoki koloba na yango moko te. Eloko mosusu esengeli kozala mpo na koloba na nzela na yango. Boye, ezali micro te, ezali mongongo to ma—makelele (na nsima) nde micro yango ememaka na—na bambónge ya mopepe, kino na litoi na yo.

<sup>38</sup> Sikawa, nde ndenge ezalaka na koteyáká Nsango-malamu. Ezali biso moko te, lokola batei, nde tozali Nsango-malamu. Kasi tozali kaka bitindeli oyo etindelaka Mongongo ya Nzambe na nzela na biso bato, kino na bayóki.

<sup>39</sup> Ezali mpe bongo ná emononeli. Nayebi likambo te ya koloba na losambo na ngonga oyo, na oyo etali emononeli. Kasi soki Molimo Mosanto atalisi ngai liboso emononeli, na nsima natindeli emononeli yango na moto oyo etindami mpo na ye. Boye, ezalaki ya ngai te, ngai, emononeli yango ezalaki ngai te, ngai. Nzambe nde apesaki emononeli yango, mpe ngai nasalaki lokola motindeli, mpo na komema nsango ya emononeli yango na bato.

<sup>40</sup> Sikawa, ezali ndenge moko mpo na fungóla. Bolimbisa ngai. Fungóla esengeli bebele kosimbama na loboko oyo efungolaka ekuke. Bomoni, loboko moko esengeli kozala. Sikawa, fungóla oyo nalingi kolobela na mpokwa oyo, loboko bebele moko nde ekoki kosimba fungóla yango, mpe yango ezali loboko ya kondima. Yango nde eloko bebele moko oyozali ekoki—ekoki kosimba fungóla yango. Maboko esímbaka bafungóla mosusu, kasi esengeli na loboko ya kondima mpo na yango.

<sup>41</sup> Sikawa, tozua ndakisa, fungóla ya boyébi. Sikawa, moto asengeli, soki azali koluka kobakisa boyebi, bomoni, sikawa, fungóla moko ezali mpo na yango. Ezali na lolenge moko oyo moto oyo asengeli kozala mpo na kofungola. Asengeli kozala . . . kozua ba-buku na ye mpe koyekola, mpe akoki te . . . moto moko te akoki koyekola na esika na ye. Bakoki kolakisa ye, kasi ye nde asengeli koyekola. Mpe nzela bebele moko mpo ékoka kosalema ezali ete, asengeli kozua fungóla yango, mwa eloko oyo na kati kuna, oyo ekofungola to eko- . . . ekomonisa ye boyebi oyo azali koluka.

<sup>42</sup> Ndakisa, bato mosusu balukaka kobeta piano, mpe bango . . . to kobeta miziki. Bayebi te ndenge babetaka yango, kasi bakoki kokende kuna mpe molakisi akoki kolakisa bango liteya moko nsima na mosusu, kasi bakotikala koyeba yango ata

moke te. Bakokaka na bango kosimba fungóla ya libombami yango te, ndenge elandanaka, ná lokito ya mondule mpe nyonso wana etambolaka elongo. Esengelaka na fungóla.

<sup>43</sup> Mpo na matematíki, fungóla moko ezalaka mpo na matematíki, osengeli koluka koyeba yango malamú. Namóná bato oyo bakokaki kozua milongo minei ya mitángo, mpe kotia misapi na bango, mosapi moko na moko na molongo moko ya mitángo, mpe kokita *bongo*, ntango mosusu, kino na milongo ya mitano to motoba ya mitángo, mpe kotia eyano na nsé. Kosaláká mituya ya milongo minei na mbala moko, na esika nyonso, kobanda na moko kino na libwa. Ee, ezalaka mpasi mpo na ngai kosala molongo se moko, longola kaka soki nazali na misapi ya maboko ná makolo ekoká mpo na kotánga, mpo—mpo na kosala mituya ya molongo moko. Nakokaka komona fungóla yango ata moke te. Kasi, bomoni, bamosusu bazalaka na fungóla na yango, bayebi ndenge ya kosala yango.

<sup>44</sup> Fungóla moko mpe ezali mpo na boyebi, mpo na moto oyo azali koluka boyebi. Fungóla moko ezali mpo na science, mpo na boluki-luki ya science. Sikawa, ezali, oyo wana ezali fungóla moko monene. Bato balukaka fungóla yango.

<sup>45</sup> Ndakisa, eleki mwa ntango, bamonaki atome, mpe bayebaki ete ba-atome ezalaka, ete ba-atome nde esalaka ba-moléculé mpe bongo na bongo. Sikawa, babandaki koluka-luka, moto moko abanzaki ete, lokola atome yango nde esimbaka nyonso esika moko, soki atome yango ekokaki kobalolama, biloko oyo yango esimbaka ekolongwa mpe ekopanzana. Mpamba te, nyonso esimbamaka na atome, toyebi yango. Sikawa, likonzi wana esimbami na ba-atome. Yo osimbami na ba-atome. Matiti, banzete, nyonso esimbamaka na ba-atome. Ee, soki atome yango, oyo ebalukaka na ngámbo moko, soki ekoki kobukama mpe kobalolama na ngámbo mosusu, na bongo libebi ekosalema. Mpe, sikawa, bato minene ya science bandimaka ete yango ekokaki kosalema, bongo basalaki mosala mpe bakobaki kosala, mpe bakamataki ngonga nsima na ngonga, mpóso nsima na mposo, mobu nsima na mobu, suka-suka balongaki likambo yango.

<sup>46</sup> Nabanzi, ezalaki Thomas Edison, na oyo etali mwinda, balobaka ete moto yango azalaki na boyebi moko ete akokaki kosala mwinda ya lotilíki. Ye moto asalá mwinda ya ampoule. Azalaki ata kolinga kokende kolala te na butu. Azalaki kosimba sandwich na loboko mpe kolia, kofanda wana, kokanisa mpe kosala mosala. Na esika moko kuna nsima ya likanisi na ye, eloko moko ezalaki koyebisa ye ete akoki kosala yango. Ezali nini? Ezali fungóla oyo ekoki kofungola nzela.

<sup>47</sup> Eleki mibu ebele te, mo—moto moko azalaki kokanisa ete azalaki na likoki mpenza ya kokoma ba-bande dessinée. Azalaki kokanisa ete azalaki na fungóla yango na loboko na ye. Mpe

alingaki . . . akendeke . . . Azalaki kofanda na Kansas. Akendeke epai ya mokonzi ya zuluna monene ya Kansas City, mpe amemaki ndambo ya makambo oyo asilaki kokoma. Mokonzi yango alobaki: “Misie, ozali na yango te. Yo, ntina ya komeka ezali te, o—okokoka kosala yango te.” Kasi yango esepelisaki ye te. Ye ayebaki ete azalaki na likambo yango. Azongaki kuna mbala na mbala, azalaki komeka, kasi ye (mokonzi yango) azalaki kaka koboya ye. Sukasuka, akendeke na bisika mosusu, bango mpe baboyaki ye, bazalaki koloba: “Misie, ozali na yo na yango te. Okokoka kosala yango te.” Kasi ata bongo, azalaki kaka kondima ete akokaki kosala yango. Mpe ezali bongo, azali na eloko moko na loboko na ye! Sukasuka, azuaki mosala ya kokoma makambo ya mike-mike mpo na, nabanzi, zulunale to eloko moko ya lingomba moko, mwa bande dessinée moko ya lingomba yango. Mpe amifútelaki mwa garage moko oyo etóndá na ba-mpuku ya minene to ya mike-mike, epai bampuku ezalaki kokima bipai na bipai ná nyonso wana, na mikanda na ye, mpe sukasuka amonaki ete mwa mpuku moko ezalaki ndenge mosusu mpenza. Ezali epai wana nde lisolo ya Mickey Mouse ebutamaki. Sikawa, ekómi Walt Disney ya multimillionnaire. Mpo na nini? Azalaki na eloko moko na loboko na ye, mpe ayebaki ete esimbaki yango, ayebaki ete akokaki kosala yango. Mpe lolenge wana nde bokokisami minene nyonso esalemaka. Ntango mibali ná basi bazali na eloko moko na loboko, bayebi ete bakoki kosala yango.

<sup>48</sup> Ntango búká-buka ebétaki ekólo. Ndenge bazali kotinda biso nyonso sikawa ete tókende kozua mángwele, mpo na kosalisa yango na mobimba. Ntango búká-buka ebétaki . . . Lobi nazalaki koyoka monganga moko wana nazalaki kotambwisa motuka na nzela, monganga moko ya Louisville. Alobaki: “Eleki mwa mibu, ntango mpasi monene wana ebétaki Louisville,” alobaki, “soki bato bázalaka esika oyo ngai nazalaki, balingaki komona ba-respirateur ntuku mitano na nsambo na mbala moko, ná mibali, basi, bilenge mibali ná bilenge basi, oyo bakómaki paralizé na bokono oyo babengaka ‘búká-buka,’ kasi eloko moko te ekokaki kosalema mpo na yango.” Alobaki: “Nalingi lisusu komona likambo ya ndenge wana ata moke te.”

<sup>49</sup> Kasi science emilobelaki: “Soki bokono mabe lokola búká-buka ezali, na ntembe te, eloko moko mpe ezali mpo na kobundisa yango.” babundaki, ba-pompier wana batelemaki na babalábala, balátaki ba-botte, babimisaki bikoti, mpe bakómaki kosenga bato mbongo, bazalaki kobóndela bango, basalaki nyonso, kolukáká fungóla mpo na kofungóla ekuke ya bonsomi. Mpe, sukasuka, elenge mobali moko ya Moklisto, nkombo na ye Salk, azuaki mangwele na yango. Mpo na nini? Mabe ezalaki kosala mosala, mobomi moko azalaki kosala mosala; fungóla moko ezalaki na esika moko, oyo ekokaki lisusu kofungolela moto bonsomi, mpe mángwele ya Salk ezalaki lisalisi monene.

Oh, makambo oyo fungóla yango ekoki kosala! Mangwele yango esalemaki, sikawa bakómi kosilisa búká-buka yango na mobimba mpo na mángwele yango, mpo ezalaki “kolemba ata moke te mpe kotika ata moke te,” fungóla yango ezalaki esika moko boye. Eloko moko ezalaki, oyo bakokaki kosalela mpo na kokata mángwele, mpe bakanaki mpenza kozua yango.

<sup>50</sup> Soki maladi mabe lokola búká-buka, diphtérie, variole, fièvre jaune, tétanos, trismus, mpe bongo na bongo, maladi yango, science ezali na makoki ya kobundisa yango, butu-moi, kino bazuáki mangwele ya moko na moko na maladi yango, mpo ezali maladi oyo ebomaka, koleka boni fungóla moko ezali mpo na lobiko, mpo na moto oyo azali na boloko ya masumu? Fungóla moko ezali na ekuke yango, mpo na kokangola bato na yango.

<sup>51</sup> Fungóla, na momesano, ntango ebalola ekangeli, mpe, ntango omoni fungóla, esengeli kozala ete bozwi moko ezali, eloko moko, oyo ezali na ntina, soki te, olingaki ata kokanga yango te. Soki ezali na ntina te ya kokanga yango, tika yango. Kasi soki ezali na ntina, kanga yango! Boye, na momesano, fungóla ezalaka mpo na ko—kokóma na eloko moko, to nzela ya kokóma na eloko moko oyo ezali na ntina. Fungóla, yango nde ntina na yango, sikawa, efungolaka eloko oyo ezali na ntina.

<sup>52</sup> Sikawa totangi na Santu Yoane, mokapo ya 10, Yesu alobaki: “Nazali Ekuke ya lopango ya bampate. Nazali Ekuke,” ekuke *moko* te, “Ekuke *yango*, Ekuke bobele moko. Nazali Nzela, Nzela bobele moko, Solo, mpe Bomoi, mpe moto moko te akoya epai na Tata soki na nzela na Ngai te. Nazali Ekuke ya lopango ya bampate, mpe baoyo nyonso bayaki liboso na Ngai bazali banguna, miyibi mpe bato mabe.” Azali Ekuke ya lopango ya bampate. Azali Ekuke ya lobiko.

<sup>53</sup> “Nkombo mosusu epesami te na nse na Lola, oyo bosengeli kobikisama na yango, bobele na Nkombo na Yesu Klisto.” Lingomba moko te, denomination moko te, endimeli moko te, mateyo ya eloko moko te; bobele na Nkombo na Yesu. Yango nde—yango nde Fungóla. Kokamwa te ndenge Petelo asalelaki moko na yango na Mokolo ya Pantekote! Balingaki koyeba lolenge ya kokóta na Ekuke yango. Asálelaki Fungóla. Mpe Fungóla ezali kaka moko, mpo Ekuke ezali kaka moko. “Ngai nde Ekuke yango.” Mpe Petelo moto azalaki na Fungóla na Yango. Mpe alobaki: “Bóbongola mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu na bino, mpe bokozua libula ya Nzambe.” Yango nde Fungóla ya Ekuke yango, mpe Yesu azali Ekuke yango.

Ekuke ya lobiko na nzoto ezali kaka moko, mpe Yesu azali Ekuke yango.

<sup>54</sup> Ekuke ya kimia ezali kaka moko. Iyo. “Napesi bino kimia na Ngai.” Azali Ekuke bobele moko ya kimia ya solosolo. Okoki

kokanisa ete ozali na kimia. Okoki kokóma na mbongo oyo ekoki mpo na kosomba ndako na yo, okoki kokóma na mbongo oyo ekoki mpo na kosombela bana na yo bilamba, kozala na bilei ya kolia, mpe okoki kokóma na lokumu ya kokoka mpo na koyebana katikati na bato. Kasi ntango olongolaka sapáto na yo na butu mpe omilengelaka mpo na kolala, Eloko bobele moko ekoki kopesa yo kimia. Ezali, soki oyebi ete okokufa na butu wana, Kimia ezali bobele moko, mpe, ezali ete, Yesu nde azali Kimia yango. Ye azali Kimia na biso.

<sup>55</sup> Ye azali Lobiko na nzoto na biso. “Nazali Nkolo Nzambe na yo oyo abikisaka bokono na yo nyonso.”

<sup>56</sup> Ye azali Ekuke ya Lola. Mpe ezali na ekuke mosusu te, to nzela mosusu te, kaka na nzela na Yesu Klisto. Ye azali Ekuke ya Lola.

<sup>57</sup> Sikawa Yesu azali Ekuke ya makambo nyonso wana, mpe kondima ezali fungóla oyo efungolaka Ekuke yango. Sikawa, soki Yesu azali Ekuke ya bilaka nyonso ya Nzambe, kondima na mosala oyo Asilá kosilisa efungolaka ekuke nyonso na libula nyonso oyo ezali na kati ya Bokonzi ya Nzambe. Bomoni yango? Fungóla ezali. . . Kondima ezali fungóla oyo efungolaka elaka nyonso oyo Apésaka. Fungóla ya kondima nde esalaka yango, kondima na mosala oyo Asilá kosala. Bafungola yango nde tozali kolobela.

<sup>58</sup> Sikawa, na Baebete, mokapo ya 11, nakomaki molongo molai ya bilombe yango ya kondima. Ezalaki fungola ya—ya Ekuke yango nde ekangaki minoko na bankosi. Fungóla yango, kondima, nde efungolaki babolóko. Ezalaki kondima, fungóla ya kondima, nde esilisaki makasi ya móto, ete bákima mopotu ya mopanga, esékwisaki bakufi. Ezalaki kondima, fungóla ya kondima na Nzambe na bomoi. Loboko wana, mobali wana, mwasi wana, oyo akoki kozua fungóla ya kondima, akoki kofungola elaka nyonso oyo Nzambe apésáki. Kasi soki ozáangi fungóla yango, ozali kaka komeka-meka, okotikaláká kofungola yango te. Okobeta-beta yango, mpo fungóla oyo. . .

<sup>59</sup> Fungóla nyonso oyo esalemi malamumu, mino na yango ezalaka na kati ya ekangeli, mpe eséngaka lolenge moko boye, lolenge moko boye ya bafungóla yango mpo na kobalola basóngé yango. Mpe soki songé moko mpamba ezali libanda na molongo, ekobebisa mobimba ya likambo yango.

<sup>60</sup> Yango wana, ngai nandimaka Nsango-malamumu mobimba, Liloba na Nzambe nyonso, yango nde ekangolaka nguya na Nzambe, yango nde ememaka mapamboli na Ye epai na bato. Fungóla ya Ekuke nde efungolaka Yango. Oh, bilombe minene wana, basakoli wana ná bato minene ya Biblia, bazalaki na fungóla yango! Yango wana bakokaki kokanga minoko ya bankosi, kosilisa makasi ya móto, kokima mopotu ya mopanga, kosékwise bakufi, mpe kosala bikamwa ya ndenge na ndenge,

ezali mpo basimbaki fungóla yango mpe bayebaki ete ezalaki kosala, mpo ezalaki fungóla ebotami na Makomi.

<sup>61</sup> Sikawa, soki nazali komeka-meka na fungóla ya endimeli, nayebi te eloko nini yango ekosala. Soki balobaka “lingomba na biso bateyaka *boye*,” oyo wana nayebi yango te.

<sup>62</sup> Kasi lokola Biblia nde elakisi yango, mpe ngai nasimbi fungóla ya kondima na loboko na ngai, to na motema na ngai, oyo elobi ete “wana ezali Liloba na Nzambe,” oyo ekosilisa makasi ya móto, ekofungola lobiko na nzoto mpo na babeli, ekofungola lobiko ya molimo mpo na babúngi. Nasengeli kopusana pembeni na Ekuke, nyonso ezali na Nkombo na Ye. “Nyonso oyo bokosala na maloba to na misala, bósálá nyonso na Nkombo na Ye.” Koyebáká ete fungóla oyo ozali na yango ezali kondima, mpo ezali fungóla oyo esalemi na Makomi. Sikawa, soki ezali fungóla ya bindimeli, fungóla ya denomination, nayebi te soki ekosala nini. Kasi soki ezali fungóla ya Makomi, ekofungola, mpo Nzambe nde alobaki bongo. Sikawa, oh, kokamwa te ndenge bakokaki kosilisa makasi ya móto, mpe bongo na bongo, bazalaki na fungóla.

<sup>63</sup> Nzambe azalaki kaka na ntina ya kosala elembo ya motó na moko na basakoli, eloko moko te ekoki kopekisa bango. Azalaki na ntina te ya kosala ndenge Asalaka, mbala mosusu, ná ngai, kobandela mbala na mbala, mpe ntango mosusu ná bino mpe (nabanzi ezali bongo te), kasi kokoba kokebisaka ngai ntango nyonso: “Kende kosala *boye*,” na nsima okobeta-beta mabaku, “Bongo kende kosala *boye*,” mpe “Zonga mpe sala yango lisusu, asalaki yango malamú te.” Kaka mwa elembo moke ya motó! Bazalaki komiyoka Molimo koyebisa bango: “Yango nde likambo ya kosala,” mpe eloko moko te ezalaki kopekisa bango. Ndeko, ba—ba—bakangaki minoko ya bankosi, bakimaki mopotu ya mopanga, babomaki móto, basalaki nyonso. Nzambe azalaki kaka kosala elembo moke ya motó, mpamba te basimbaki fungóla yango na maboko na bango, kondima monene wana! Bazalaki kosala makambo mpo na Nzambe mpo eloko moko te ekopekisa bango. Oh, nkembo mpenza!

<sup>64</sup> Lokola elenge mobali oyo ayaki, mokolo moko, epai ya ndeko mobange moko ya mosantu, mobange mosakoli moko ya Nzambe. Ayókáká moto yango kotátola ntango nyonso, kolobela ntango nyonso bolamu na Nzambe, ndenge Nzambe azalaki, mpe oyo Klisto azalaki, akobaki kolobela yango ntango nyonso. Sukasuka, elenge mobali yango balingaki kobulisa ye lokola motei, na bongo ayaki kokutana na mobange ya bwanya yango, mpe alobaki na ye: “Mesie, nalingi kotuna yo motuna moko.”

Alobaki: “Tuna, elenge mobali.”

<sup>65</sup> Alobaki: “Klisto azali mpenza-mpenza na motuya mpo na yo ndenge olobi Azali?”

66 Alobaki: “Azali na motuya mingi mpo na ngai, koleka nyonso oyo nakoki koloba na mpéma na ngai!” Yango mpenza. Ezalaki nini? Asilaki kozua fungóla.

67 Elenge mobali yango alobaki, likoló na yango: “Soki olobi ondimaka makambo oyo, mpe olobi na ngai ete ezali mpenza ya solo ndenge yo ozali, na bongo nalingi koyeba Yesu moko wana, na bosolo moko wana.” Ezalaki nini? Ayebaki ete mobange yango asimbaki fungóla, ete azalaki na makoki ya kofungola ná makoki ya kokanga.

68 Boyebi, fungóla oyo ekangaka, efungolaka mpe. Bomoni? Okoki kofungola to kokanga. Ya solo. Fungóla moko oyo ekangaka, efungolaka. Fungóla oyo efungolaka, ekoki kokanga. Ezali mpenza bongo, bomoni, mpo esalaka na ngámbo nyonso mibale. Ezali mawa mingi ete lingomba etikali mpenza kobungisa emononeli na yango! Ezalaki mpenza mawa, ntango lingomba emitekaki na bindimeli, ndenge tosali lelo, mpe sikawa ekómi koluka bomoko.

69 Tomonaki epai bokitani monene ya Roma ná bamosusu bakokutana sikawa, bakobongola manáka mosusu. Nakanisaki ete bakobongola yango te; kasi bakosala yango, ata bongo, bakopesa nganganzambe moko na moko nguya ya pápa, mpe—mpe esika nyonso akozala, ná nyonso wana. Mawa mingi, ndenge lingomba emiteki na biyambweli na esika ya Liloba. Bomoni? Wana nde epai batikaki fungóla, na ntango yango mpenza. Yango wana bikamwa minene ná bilembo ezali lisusu kosalema te katikati na bato lelo, ndenge ezaláká kosalema, basili kobúngísa fungóla! Iyo, bayebi Ekuke, bayebi ete Ekuke ezali wana, kasi eloko oyo elandi ezali fungóla mpo na kofungola Ekuke. Nkita ezali nsima na Ekuke yango. Ekangámá mpenza, mosika na miso, ya mozangi-kondima. Kasi mondimi, oyo azali na kondima mpe akoki kozua fungóla ya kondima, akoki kofungola Bikuke yango. Iyo, mesie.

70 Mokolo moko, eleki mwa mibu, ndeko moko missionnaire amiyokaki ete abengamaki na Afrika. Azalaki elenge mobali; azalaki na mwasi ná bana mibale, ya kitoko mingi, bana mike ya basi, bazalaki na mibu pene na nsambo to mwambe, moko na moko. Elenge mobali oyo azalaki kokoka kokima likambo yango te. Azalaki mo—motei, azalaki na losambo kitoko na libanda na engumba. Kasi azalaki kokoka kokima mbela yango te, “asengelaki kokende na Afrika”. Mpe abondelaki, butu-moi. Alingaki na ye kokende te. Kasi Nzambe akobaki koloba na ye: “Osengeli kokende!” Sukasuka, akómaki na esika oyo asengelaki kozua mokano, epai, a—asengelaki kokende!

71 Boye, akendeki na likita ya ba-missionnaire ya lingomba na bango, mpe alobaki: “Nzambe abengi ngai na bilanga ya koteya, mosika kuna na bazámba ya—ya Rhodesie.” Mpe zámba yango etondi na malaria, ná fièvre, ná moi makasi wana, ná bampasi

mpe maladi ya mába, ná makono ya ndenge na ndenge, kuna na zamba yango, epai asengelaki kosala . . . kolekisa bomoi na ye oyo etikali. Atékaki ndako na ye ná nyonso oyo azalaki na yango. Boye likita ya ba-missionnaire balingaki komeka ye, balobaki: “Ondimisami mpenza sikawa?”

Alobaki: “Nandimisami mpenza.”

<sup>72</sup> Balobaki na ye: “Misie, osili kokanisa likambo yango ete ozali na bana basi mibale mike ya kitoko, mpe ozali na—na elenge mwasi ya kitoko, mpe ozali kaka . . . Mpo na nini te kokende kuna te, mpe kotala ndenge ezali, na nsima, ózonga awa?”

<sup>73</sup> Alobaki: “Te, Nkolo nde ayebisaki ngai. Oh, ezali mpenza likambo ya solo!” Alobaki: “Nkolo abengi ngai. Nazali na mposa ya—ya kotika ndako na ngai te, nazali na mposa ya kotika losambo na ngai ná bandeko na ngai te, kasi Nkolo abengi ngai kuna mpo nákende na zamba wana.”

<sup>74</sup> Alobaki: “Misie, oyebi ete bana na yo ya basi bakoki kozua bokono ya fièvre jaune to fièvre bilieuse, mpe kokufa, na mokolo moko?” Mpe alobelaki bato mingi oyo bakuféla bana na bango, bana mike, mpo bamemaki bango kuna, ná makono oyo mangwele na yango ezalaki te. Mpe alobaki: “Kanisa maladi ya mába, soki mwasi na yo ya kitoko ná bana na ya mike mibale ya basi babéli maladi ya mába, ná moi makasi wana mpe makambo oyo osengeli koleka na yango.” Alobaki: “Ozali kobanga te likámá ya komema bana na yo ná mwasi na yo na esika ya ndenge wana?”

<sup>75</sup> Mpe missionnaire yango atelemaki wana, elenge mobali yango, mpe mpisoli ebandaki kokita na matáma na ye, abalukaki, alobaki: “Bandeko na ngai! Emononeli na ngai ya mbela ya Nzambe,” alobaki, “soki Nzambe abengi ngai na Afrika, bana na ngai ná libota na ngai bakobátelama malamumu na Afrika, koleka na bisika mosusu nyonso na mokili.” Amen. Ezalaki nini? Azalaki na fungóla ya mbela na ye, azalaki na kondima na likambo oyo azalaki kolobela. Oh, namilobelaki, eyano kitoko mpenza! Ntango nayokaki yango mbala ya liboso, motema na ngai ebétaki makasi. Bomoni: “Soki Nzambe abengi ngai na Afrika, bana na ngai, na kati ya maládi ya mába, bampasi mpe nyonso wana, bakobatelama malamumu kuna, koleka na bisika mosusu nyonso na mokili mobimba.” Azalaki na fungóla. Yango nde esengaka.

<sup>76</sup> Na ntango ozali na fungóla, nsómo ezali te, ntembe ezali te, motuna ezali te. Ozali na ntina ya kotuna moto mosusu te na ntina yango, oyebi yango malamumu mpenza. Ozali na yango na maboko na yo, oyebi nini kosala. Amen. Oyebi oyo mbano yango ezali, oyebi ete ekuke yango ekofungwama. Osíli komeka basóngé yango mpe oyebi ete ezali mpenza eloko oyo esengeli,



ekuke yango ekofungwama noki-noki, soki okótisi fungóla na kati na yango.

<sup>77</sup> Oh, soki lingomba ézalaka mpenza na bafungóla yango! Soki lingomba ézalaka mpenza na fungóla oyo ya kondima, tokokaki kofungola ekuke nini, bokono nini, mpasi nini, likambo nini oyo ezali. Ekokaki kofungwamela biso, soki tózalaka na fungóla yango. Mobali oyo azalaki na fungóla ya mbela na ye.

<sup>78</sup> Soki bokolimbisa ngai nápesa litatoli ya ngai moko. Namikaniseli eleki sikawa pene na mibu zomi na mitano to zomi na nsambo, pene na yango, ntango Nkolo alobaki na ngai kuna na ebale, ntango Akitaki na kati ya Likonzi na Mótó Oyo bomonaka fotó na Yango, Alobaki na ngai mpe Alobaki: “Osengeli komema Nsango oyo na mokili mobimba.”

Mpe namikaniseli na Green’s Mill, ntango Alobelaki ngai.

<sup>79</sup> Nakendeki koyebisa mokengeli, mpe ye ayebisaki ngai, alobaki: “Billy, oliákí enini na butu yango? Olótaki ndoto ya mabe.” Alobaki: “Zóna na mosala na yo. Osálaka na Kompani ya Letá, ozali na mosala malamú, zóna kuna mpe sála mo—mosala na yo, mwana.” Alobaki: “Olótaki ndoto ya mabe. Oliákí eloko moko.” Ebángisaki ngai ata moke te!

<sup>80</sup> Ntango nabandaki kosala mayangani ya kobondela mpo na babeli, mingi kati na bino awa bazali komikanisela Liteya na ngai na ntongo wana, *Ntango Dawidi Akendeki Kokutana na Goliata*, nateyaki liteya yango.

<sup>81</sup> Bayebisaki ngai, alobaki: “Na ntango ya science ya mikolo oyo, ntango oyo tokómi na boluki-luki ya kimonganga ya ndenge na ndenge, na ntango oyo tokómi na minganga ya malamú koleka, ntango oyo lingomba ebosáná kala-kala lobiko na nzoto uta na Nzambe ná makambo mosusu, esili koleka mibu ebele, ebele, ndenge nini okoke kobunda na engambe monene ya ndenge wana? Ndenge nini okokutana ná ba-Methodiste, ba-Batiste, ba-Presbytérien, mpe bongo na bongo, ata mpe ba-Pantekotiste, oyo babosáná likambo yango kalakala, mpe bakómá kolanda bindimeli na bango? Ndenge nini okokutana na bango, wana ozali ata na denomination moko te to eloko mosusu te mpo na kosunga yo? Okosala nini, Bill?” Na lolenge moko to mosusu, ebángísákí ngai ata moke, mpo nasímbaki na loboko na ngai fungóla! Nalobaki. . . Balobaki: “Moto moko te akondima yo. Okozala na makoki ya kosala yango te. Moto moko te akondima yo.”

<sup>82</sup> Nalobaki: “Etali ngai te. Nayebi kaka likambo moko; Nzambe abengaki ngai, mpe nasengeli kokende mpo Nzambe abengaki ngai.” Nasimbaki fungóla. Abengaki ngai, Alakisaki ngai, Asilaki koyebisa ngai, mpe namonaki Bozali na Ye ntango Apesaki ngai etinda, mpe fungóla ezalaki wana!

<sup>83</sup> Mokengeli alobaki: “Osúka na kelasi ya nsambo, mpe okoteya mpe okobondela liboso na bakonzi ná bankúmú!”

Nalobaki: “Ezali yengebene na Liloba na Ye!”

<sup>84</sup> Pene na eleko oyo na mobu eleki, to mpóso moko to mibale liboso, ntango nayaki na losambo awa mpe nayebisaki bino ete Nkolo Nzambe autaki kopesa ngai emononeli moko, ete nakosala mobembo ya bokila, mpe—mpe ete nakomona nyama moko boye, oyo ekozala na maseke ya centimètre mokama na mitano. Ete na nzela ya bozongi, nsima na komona nyama yango (esika ekozala, ndenge ekolala), na nzela ya bozongi, nakoboma ngombolo grizzli moko ya mwa mpembe. Nakendeki na etuka yango, mpe nasololaki na mobali moko, mpe alobaki: “Nayebi ata nyama moko te oyo ezali ndenge wana. Na oyo etali ngombolo grizzli, namóná naino yango te.”

Nalobaki: “Kasi esengeli kozala na esika moko awa.”

<sup>85</sup> Na bongo alobaki: “Tozali ata kokende na etuka ya bangombolo te. Tozali kokende epai bampate ya zamba bazalaka, mosika koleka ndelo ya zámba.” Ee, nakendeki elongo na ye.

<sup>86</sup> Mpe na mokolo ya mibale, na esika yango mpenza oyo Nkolo alobaki, nyama yango ezalaki wana. Boye, ntango nakendeki mpe nabomáki nyama yango, ntango tozalaki kolongola mposo ná maseke mpe bongo na bongo, alobaki: “Nalingi kotuna yo likambo moko. Oyebisaki ngai, eleki mikolo misato, ntango tolongwaki na—na moláko, ete nsima na yo koboma nyama oyo, na nzela ya bozongi, ‘okoboma ngombolo grizzli moko ya mwa mpembe.’”

Nalobaki: “Ezali YANGO ELOBI NKOLO!”

<sup>87</sup> Alobaki: “Natii ntembe te,” alobaki, “mpo ndeko na ngai azalaki na maladi ya ndeke, mpe omónáká ye naino te na bomoi na yo, ntango ozalaki awa mokolo moko, mpe oyebisaki ngai ete mwana mobali yango akobíkisama ntango nakosala likambo moko boye. Mpe abikaki.” Alobaki: “Sikawa, kasi, Ndeko Branham, nalingi kotuna yo,” alobaki, “nazali komona ngomba mobimba, kino esika ndelo ya zámba ezali, esika bampunda wana ezali. Kasi eloko moko ezali kuna te. Ata mwa lititi moko ezali te, ata libanga moko ezali te, eloko moko ezali te.” Mwa matiti ya mike-mike, oyo ba-caribou baliaka, ya centimètre mitano nde ezali likoló na ndelo ya zamba, kino koleka kilomètre moko likoló na ndelo ya zamba. Alobaki: “Ngómbolo yango ekozala wapi?”

<sup>88</sup> Nalobaki: “Nzambe azali Jehovah-jireh. Soki Ayebisaki ngai ete ngombolo moko ekozala wana, ekozala wana.”

<sup>89</sup> Tozalaki kokita ngomba, mbala nyonso tozalaki kopusana mètè pene na nkama mwambe to pene na yango, azalaki koloba: “Ndeko Branham, ntango ekoki oyo ngombolo yango esengeli komonana.”

Nalobaki: “Komitungisa te, akozala awa.”

<sup>90</sup> Mpe ntango etikalaki mètère pene na nkama mitano liboso tókóma esika bampunda ezalaki, tosendelaki kopema lisusu mpo tomemaki maseke ya bozito ná nyonso wana na mikongo na biso. Atambwisaki lisusu miso, mpe namonaki elongi na ye ntango atalaki ngai, lokola na nsé ya motema na ye azalaki komituna. Bomoni, azalaki na *elikya* ete ekozala wana, kasi azalaki na fungóla te.

<sup>91</sup> Kasi na lolenge moko boye, na ngolu na Nzambe, Ayókísá ngai nsoni ata moke te. Ntango Ayebisaki ngai ete ngombolo ya mwa mpembe ekozala wana, nazalaki na fungóla. Natiaki ntembe ata moke te, soko moke te. Nabalukaki epai na ye, mpe nalobaki: “Bud, ekozala wana.” Mpe ntango kaka nabalukaki, ngombolo yango ezalaki wana [Maloba mazangi na bande—Mok.] ezalaki mpenza likoló na biso, pene na mètère nkama mwambe.

<sup>92</sup> Atalaki na ba-jumelle, alobaki: “Billy, boye sunga ngai, ezali ngombolo monene ya mwa mpembe!”

<sup>93</sup> Bomoni, fungóla, emononeli, Liloba ya Nkolo, eloko moko te ekoki kobongola Yango to kopekisa Yango. Oyo lingomba esengeli na yango na mpokwa oyo, ezali mayele ya kelasi te. Oyo lingomba esengeli na yango na mpokwa oyo, ezali denomination te. Oyo lingomba esengeli na yango na mpokwa oyo, ezali endimeli te. Oyo lingomba esengeli na yango na mpokwa oyo, ezali fungóla ya Makomi, Ekuke. Elingi koloba, Klisto azali Ekuke, mpe Azali Liloba. Kondima na Liloba ya Nzambe na bomoi ndé efungolaka bikuke nyonso.

E Nzambe, pesa biso fungóla. Pesa biso fungóla.

<sup>94</sup> Baebele, mokapo ya 12, elobi: “Lokola tozingami na lipata monene boye na batátoli, tólongola bozito nyonso, ná kozanga kondima oyo ekangaka biso na pete.” Elobi “lisumu,” elingi koloba, *lisumu* ezali “kozanga kondima.” Bomoni? Lisumu moko mpamba, ezali kozanga kondima.

<sup>95</sup> Mpe *lisumu* elingi koloba “koleka pembeni”. Ezali lokola ozali kobeta masasi, kasi eleki pembeni, ekozala malamú ete ósembola bondóki na yo, bomoni, mpo mbeba moko ezali. Obeti pembeni. Bomoni, yaka lisusu mpe meka lisusu. Bomoni? Elingi koloba kobaluka, masasi na yo eleki pembeni. Ntango olingi kozala Moklisto, mpe okei kokota na lingomba, oleki pembeni. Ntango olingi kozala Moklisto, mpe bamwángisélá mai na nkombo ya “Tata, Mwana, Molimo Mosanto,” oleki pembeni. Malamú ózongela. Masási na yo ekoleka pembeni. Ekoleka mosika, na ntembe ata moke te. Eloko kaka moko oyo ekoki kobatela yo na molongo mpenza, ezali Makomi, Biblia, Liloba. Mpamba te, likoló ná nse ekoleka, kasi Liloba na Nzambe ekoleka ata moke te.

<sup>96</sup> Boye, símba fungóla, kondima na Liloba! Mpe na biteni nyonso ya kondima na yo, ndima, mpe kotia ntembe ata moke

te, okoki kofungola bikuke nyonso oyo ezali katikati na yo ná lipamboli oyo Nzambe azali na yango mpo na yo. Tika ete Nzambe ázunga biso mpo tózala na bafungóla yango, yango nde libondeli na ngai. Tógumba mitó sikawa mpo na kobondela.

<sup>97</sup> Tata na biso na Likoló, totondi Yo na mpokwa oyo mpo Opesi biso fungóla moko mpo na kofungolela biso lobiko. Na—natondi Yo mpo na yango, Nkolo, mpo tobikisami, mpe mpo na fungóla oyo tozali na makoki ya kosalela kino lelo. Kasi, e Nzambe, pesa biso kondima, mpo Maloba nyonso oyo ekomami na Buku na Yo ezali mwa bamino, mpe Fungóla yango, oyo ebengami Yesu. . . Ekuke yango, nalingaki koloba, oyo ebengami Yesu; ná fungóla, oyo ebengami kondima, esimbaka Liloba moko na moko, efungolaka yango. Eningisaka mwa sónge wana, bongo biso tókoka kokota na lipamboli yango. Tata na Likoló, pesa biso bafungóla, mpo tókoka kozala na kondima na bilaka ya Nzambe, mpo kondima na biso ékweya te, mpo tókoka kosala mosala mpo na Yo mpe mpo na baoyo tozalaka elongo na bango.

<sup>98</sup> Limbisa masumu nyonso ya kozanga kondima na biso, Nkolo, mpe sunga biso mpo tózala ya Yo. Tobelemi sikawa na mesa ya elámbo, mpe nabondeli, Tata na Likoló, ete Ólimbisa biso na mabe na biso nyonso, mpo tókoka kokóta na esengo ya bondeko zinga-zinga na mesa ya Nzambe. Tosengi yango na Nkombo na Yesu. Amen.

<sup>99</sup> Ndeko na ngai mobali mpe ndeko mwasi, soki ozali na fungóla ya Bokonzi, fungóla ya Ekuke, fungóla ya lobiko, Nzambe ázunga yo mpo ófungola bikuke mpe ótika Yesu ákota. Tika ete Ye Ápesa yo biloko oyo ozali mpenza na—na mposa na yango.

<sup>100</sup> Sikawa, bózela mwa moke, liboso tóbanda kotánga mpo na elambo, nalingi koloba likambo moko mpo etali elambo. Ntango tobélemaka na etumbelo oyo, nzela ya koya ezali bobele moko, ezali, soki tosimbi fungóla ya kondima na maboko na biso, yango nde esálaka ete tóyeba ete masumu na biso elimbisami. Kasi soki tozángi fungóla yango mpo na kofungola Ekuke yango, mpo masumu na biso élimbisama, tozali na ntina ya koya na mesa ya Nkolo te. Mpamba te, ye oyo akolia mpe akomela na motindo mobongi te, akomiliela mpe akomimelela ekweli mpo na ye moko, wana asósolu nzoto na Nkolo te. Sikawa, wana ezali solo.

<sup>101</sup> Nabanzi ete biso nyonso toyebi ete lelo ezali Mokolo ya Elambo mpo na Ekólo. 101 Lelo nde mokolo oyo mangomba nyonso baliaka elambo. Ezali Mokolo ya Elambo na Ekólo mobimba. Namilobelaki ete ekozala ntango oyo ebongi mpo na koloba liloba moko to mibale na ntina na elambo, liboso tólia yango, wana mokengeli, soki alingi, azali kobongisa Makomi ya kotánga na ntina na—na molongo na mesa ya Nkolo. Sikawa, elambo oyo. . . Sikawa, nakozua kaka pene na miníti zomi.

102 Elambo oyo tolingi kolia, ezalaka likambo ya kowélana makasi koleka na mateyo na kati ya Biblia. Wana ezalaki ya bango... ezalaki moko na kowelana na bango ya liboso na lingomba ya ebandeli. Mpe lelo ba-Protestant, ya ba-Episcopalien mpe ba-Methodiste, ná mangomba mingi ya ba-Protestant, bakoki na bango kondima mateyo ya ba-Katoliko, ba-Katoliko ya Roma, soki bakokaki koleka likoló na mwa epekiselo ya elambo. Kasi bandimaka ete ba-sángo bábala mpe bázala batei, lingomba Katoliko basilá kondima yango mbala ebele na makita mpe mayangani na bango. Bayókanaka na likambo yango. Mpe bakoyókana na ntina na mabondeli ya ndenge na ndenge, mpe nyonso wana, lingomba Protestant bakondima yango. Ná ba-katekísimo mpe nyonso wana, bitumbelo mike-mike bipai na bipai, lingomba Katoliko ekondima kosala yango. Kasi ntango ekómaki na likambo ya elámbo, bayokanaki te. Moto nyonso oyo asílá kotángá histoire ayebi yango. Kasi, na ntembe te, na ndenge na ngai ya komonela, basengelaki kotika makambo ebele, liboso ná—nákoka kondima yango, bomoni, mpo ezali Biblia te.

103 Kasi nalingi bóloba likambo moko na lingomba Katoliko. Boyebi ete lingomba Katoliko, na ebandeli, ezalaki lingomba ya pantekote ya bantóma? Ya solo mpenza! Ezalaki liboso na ebandeli ya lingomba. Kasi bomoni epai ba—epai bakómi, bakobaki kolongola Liloba moke-moke, mpe kokotisa biyámbweli.

104 Mpe soki lingomba Pantekotiste esengeli kokoba kozala na mibu mokama mosusu, ekokóma mosika mingi na Biblia koleka ndenge lingomba Katoliko ezali lelo, na ndenge ezali kotambola sikawa.

105 Ezuaki lingomba Katoliko mibu nkama na nkama mpo na kotángwa na Yango, mibu nkama misato, kobanda na lingomba ya ebandeli kino ntango lingomba Katoliko ya Roma ekómaki ebongiseli, oyo bango babandaki. Bazalaki kozua, kokotisa bakonzi minene mpe nyonso wana, mpe bakokáta eloko *oyo* mpe bakokótisa eloko *oyo*, kolongola *oyo* mpe kobakisa *oyo wana*, balongolaki banzambe bikeko ya bapakano mpe batiaki bikeko ya Baklisto, mpe bongo na bongo, mpe kokakoláká na Yango, kino bakómaki na oyo bazali na yango lelo, lingomba Katoliko ya Roma.

106 Mpe lingomba Pantekotiste ya Protestant, oyo esili ko—kokisa mibu ntuku mitano, mpe esika oyo ekweaki longwa na esika oyo ebandaki, ekokóma mabe mingi koleka lingomba Katoliko, nsima na mibu mokama. Ya solo. Ezali maloba makasi ya koloba, kasi bótala kaka esika oyo bango basili kokweya. Bamikotisaki na ebongiseli, bamikotisaki na kokakola likambo *oyo ná oyo wana*, ná makambo nyonso mosusu. Mpe bango wana bakei, bomoni, bazali kozonga nsima.

107 Kasi, *elambo*, babengaka yango “Bilei ya mpokwa ya Nkolo.” Sikawa, bato mingi balingaka kolia yango na ntongo. Biblia elobaki te ete ezali *bilei* na *Ye ya ntongo*. Kino lelo, bato balobaka “bilei ya mpokwa ya Nkolo,” kasi basalaka yango te. Basili kokáta *bilei ya mpokwa*, balongoli yango, mpe bakómi kobenga yango “bilei ya moi,” bolema. Bilei ya mpokwa!

108 Sikawa, ezalaka ntango nyonso likambo moko ya kowélana na bileko ya Biblia, ezalaká kowelana na ntango wana. Bato bazalaki kosósola elambo ya Nkolo mabe. Ntango bazalaki koya na mesa, ndenge Polo ayebisaki Bakolinti wana, bazalaki koya kolangwa na mésa ya Nkolo. Bomoni, bazalaki kosósola yango mabe, mpenza na ntango wana. Alobaki: “Soki bolingi kolia, bolia na ndako.”

109 Likambo mosusu, bazalaki kosósola mabe oyo yango ezalaki. Basumuki, ná moto oyo azali kobika na masumu, azalaki koya kolia elámbo. Yango mpe esósólamaki mabe. Mobali oyo azalaki kobika ná mama na ye, ná mama bokilo na ye, mpe lingomba basilaki koyebisa ye yango; azalaki kaka kolia elámbo na mésa.

110 Bokabwani ezalaki mingi katikati na bango, kasi bazalaki kaka kolia elambo. Alobaki: “Nasósoli ete bozali kotambola lokola bato ya Mabota nyonso. Mpe kozanga bo—boyokani katikati na bino, lokola oyo ezali na ndako ya Kefa, koleka mingi, ná bamosusu.” Alobaki: “Bozali kotambola lokola bato ya Mabota nyonso.” Bomoni, bazalaki kosósola yango mabe.

111 Elambo esósólamaka ntango nyonso mabe. Sikawa, nakoki kokoba kolobela yango ba-ngonga mingi, kasi tosendeli kolia elambo mpe kosukolana makaká. Sikawa basili na bango kolongola kosukolana makaká na mobimba, longola kaka ba-dénomination moke. Ba-Pantekotiste mingi basili kotika yango mosika mpenza. Bomoni? Mpe ezali naino na Biblia, kaka ndenge ekomámáká. Bomoni?

112 Sikawa, Roma ebéngaka yango “elambo” te. Bango babéngaka yango “mísa, ezali mísa mosantu.” Baliaka elambo te, bakendeke na mísa. Ezali mísa, mpe mísa, na ntembe te, elongoli mpenza ndimbola ya solosolo ya elambo. *Misa* elingi koloba “kolikia”. Bakendeke na mísa, na elikia (ete na kosaláká yango na kati ya mísa) ete Nzambe akolimbisa bango masumu na bango, na koliáká “nzoto mpenza ya Klisto, oyo sángo abóngolaka na Nzoto mpe Makila ya Klisto,” baliáka yango na elikia ete Nzambe akolongola masumu na bango ntango basali bongo. Ezali mísa.

113 Ba-Protestant babéngaka yango “elambo”. Elambo elingi koloba “kozongisa matondi.” Protestant...Mo-Katoliko akendeke na mísa, na elikia ete na nzela na mísa yango, Nzambe akolimbisa ye misala na ye ya mabe. Protestant aliáka yango na kozóngisáká matondi mpo na oyo esilaki kosalema na nzela na boyókani ná Nzambe; kosangana ná Ye, ete yango esili

kosalema. Mo-Katoliko azali kolikia ete ekosalema; Protestant alobi ete esili kosalema. Mo-Katoliko azali komituna soki masumu na ye elimbisami; Protestant azali kotátola ete yango elimbisami, ete azali nsómí. Mpe elambo ezali kosangana ná Nzambe. Mpe biloko yango oyo toliaka, na *elikia* te ete masumu na biso malimbisami, kasi *masili* kolimbisama. Mpamba te yango. . . Moko ezali elikia; mosusu ezali kondima. Moko azali kolikia ete azali na molongo; mosusu ayebi ete azali na molongo. Bomoni? Mosusu, moko azolikia, mpo ayebi te esika oyo atelemi; oyo mosusu ayebi ete azali na molongo, mpo ayebi oyo Nzambe alobaki. Ezali bongo. Yango nde bokeseni. Boye, soki ozali kaka kolikia, kéba; kasi ntango oyebi, na bongo kende liboso. Bomoni, na bongo ozali na boyokani ná Nzambe. Protestant azali, alobi ete alimbisami mpe ayebi yango; mo-Katoliko akendeke na mísa, na elikia ete akolimbisama. Ezalaka mpenza boye: moko azali mosengi-sengi, kolikiáká ete nyonso ekotambola malamu, bomoni; mosusu azali mosengi-sengi, azozongisáká matondi mpo na oyo esili kosalema. Bango mibale bazali basengi-sengi. Kasi moko azali kosenga-senga, na elikia ete akozua; mosengi-sengi mosusu ayebi ete azali na yango, mpe atondi Ye mpo Apesi ye yango. Sikawa, yango nde bokeseni. Oyo wana nde elambo. Iyo, misie. Moko azali kolikia ete alimbisami; mosusu ayebi ete alimbisami, mpe azali kozóngisa matondi mpo na yango.

<sup>114</sup> Boye, elambo ezali mpo na Baklisto oyo babótami mbala mibale na Molimo ya Nzambe. Mpe *kobótama mbala mibale* elingi koloba te ete, na ntembe te, ozali na Molimo Mosanto. Bómikanisela yango. Sikawa, bato mingi batéyaka bongo. “Nayebi moto moko te oyo ateyaka yango boye,” ndenge mobange Ndeko Arganbright alobaki na mpokwa wana, na eteyelo awa, bomoni. Kasi, mbotama ya sika ezali libatizi ya Molimo Mosanto te. Makomi elobi bongo te, nandimi te, bomoni, na ndenge na ngai ya komonela yango. Bomoni? Nandimaka ete moto abótamaka mbala mibale. . .

<sup>115</sup> Yango wana nasálelaka liloba oyo libatizi na Nkombo na Yesu Klisto, kasi mpo na kozóngisama sika te. Sikawa, Église Pentecotiste, Église Pentecotiste Unie, babátisaka na Nkombo na Yesu Klisto mpo na kozóngisama sika. Ngai nandimaka yango te. Bakoki kosala yango soki balingi. Kasi ngai nandimaka ete Petelo alobaki: “Bóbongola mitema,” liboso. Mai elímbisaka masumu te. Église du Christ etéyaka yango bongo. Kasi nandimaka ete kobongola motema, mawa ya bozambe; *kobongola motema* elingi koloba “kobaluka, kozonga,” masási na yo ebetaki pembeni, “zóngela lisusu.” Sála yango liboso! Mpe libatizi na yo na mai ezali bobele mpo na kotalisa na libanda ete likambo moko esili kosalema na kati na yo, ete osili kondima Klisto lokola Mobikisi na yo.

<sup>116</sup> Nabanzi ete kaka bato ya losambo oyo nde bazali awa na mpokwa oyo, na boyebi na ngai, nazalaka awa mingi mpenza

te mpo na koyeba nani ayaka awa to te. Balobelaki ngai awa, kala mingi te, mpo nabatisaki moto moko awa na pisini, azalaki mobange. Nakendeki epai na ye, azalaki mobange moko malamumu. Nazuaki litómba ya komema libota na ye mobimba epai na Klisto, bango nyonso bazali Baklisto. Mobange yango azalaki mobange moko malamumu, mpe nasepelaki na ye, na bongo nakendeki epai na ye mpe nalobaki na ye: “Papa, mpo na nini okómaka Moklisto te?” Alingaka ngai.

117 Alobaki: “Ndeko Branham, nakokóma Moklisto ntango nakokóma mpenza moto malamumu.”

118 Nalobaki: “Nakoyebisa yo eloko oyo okosala, Papa. Luká zinga-zinga kino okomona esika okokóma malamumu mpenza, na nsima yébisa ngai esika yango, ngai mpe nalingi kokende kuna.” Nalobaki: “Klisto ayáki kobikisa bato malamumu te. Ayaki kobikisa bato mabe.” Soki okanisi ete ozali malamumu, na bongo Ayáki kobikisa yo te. Ayáki kobikisa baoyo Ayebi ete bazali mabe. Bomoni? Klisto akufaki mpo na kobikisa basumuki. Bomoni? Mpe nalobaki: “Papa, ndelo moko ezali kaka awa.”

Alobaki: “Ee, namelaka makaya.”

Nalobaki: “Nakolobela ata yango te.”

Alobaki: “Namekaka kotika yango, Ndeko Branham.”

Nalobaki: “Malamumu, tokosolola na ntina na makaya te.”

Alobaki: “Ee, ntango nakokoka . . .”

119 Nalobaki: “Ko—kolobela yango lisusu te, tiá yango pembeni. Nalingi kotuna yo motuna moko.”

Alobaki: “Malamumu, ezali nini?”

Nalobaki: “Ondimaka ete Nzambe azali?”

120 Alobaki: “Na ntembe te, nandimaka yango.” Alobaki: “Nandimaka yango na makasi nyonso lokola yo, nabanzi, Ndeko Branham.”

121 Nalobaki: “Ondimaka ete Nzambe yango moko asangísaki ná bakitani na Ye, ete Akómaki mosuni mpe Afandaki elongo na biso na kati ya bomoto ya Yesu Klisto, mpo na kobikisa moto?”

Alobaki: “Iyo, nandimaka yango.”

“Ete Akufaki mpo na kobikisa basumuki lokola yo mpe lokola ngai?” Bomoni?

“Iyo, nandimaka yango.”

122 Nalobaki: “Sikawa, ezalaka boye. Bisó nyonso tozali na kati ya ndako monene moko awa, mpe tozali na bolóko, kasi nakoki te kotelema na litúmu oyo mpe koloba ‘yango nde ekosunga ngai kobima na bolóko,’ nátelema na litúmu wana mpe náloba ‘yango nde ekosunga ngai kobima na bolóko,’ bisó nyonso tozali na kati ya mikakatano moko. Mpe moto nyonso oyo abótámá na mokili oyo abótámá na masumu, asálémá na lisumu na nko,



abótamaki na mokili na lokuta na monoko. Azali motomboki, mpo na kobanda.”

123 Moto moko atunaki ngai mokolo wana, alobaki: “Ndeko Branham, soki . . . bokeseni nini elingaki kozala kati na Adama ná Ewa, ná bana na bango lelo, soki bango nyonso bazalaki bolumbu, kotámbolaka na . . . Ba—ba—nzoto na bango elingaki kozala ndenge moko?”

124 Nalobaki: “Te, misie.” Tozalaki kozonga, toutaki na mobembo ya bokila ya biséndé, Ndeko Fred ná ngai, ná mingi na bango. Nalobaki: “Te, balingaki kozala ndenge moko te.”

125 Alobaki: “Olingi koloba ete Eva alingaki kozala mwasi lokola bana na ye ya basi te, mpe Adama alingaki kozala mobali lokola bana na ye ya mibali te?”

Nalobaki: “Na makambo mingi, kasi na makambo nyonso ya nzoto te.”

Alobaki: “Bokeseni elingaki kozala nini?”

126 Nalobaki: “Balingaki kozala na motolú te. Bango bakelamaki. Ya solo. Bakanganaki na eloko moko te.”

127 Lokola ezalaka na nyonso oyo ebótamaka na mokili oyo, elakisaka ete ezali motomboki, mpo na kobanda. Ya solo. Nalobaki: “Ya solo, bokeseni ezali. Balingaki kozala na motolú te. Bakanganaki na mwasi moko te, mpo na koya awa.” Bomoni, Nzambe akelaki bango.

128 Sikawa, nalobaki: “Nalingi koloba likambo moko. Na bato nyonso oyo bazali na kati ya bolóko oyo, nani azali mosanto? Nani abotámá na nzela ya mwasi ná mobali te? Nani akoki kosunga moninga, ata azali nani? Bisó nyonso tozali na kati ya bolóko yango moko. Kasi Nzambe amikómisaki moko ná bikelamu na Ye, mpe ayaki na nzela na mwasi na mobali te, kasi na nzela ya Makila oyo Ye moko Akelaki, mpe na nzela na Makila yango, Asíkolaki biso.” Nalobaki: “Ondimi yango, Papa?”

Alobaki: “Nandimi yango.”

129 Nalobaki: “Klisto akufaki mpo na bato mabe lokola yo. Sikawa, nzela ya kolóngá ezali kaka moko. Okoki kosala eloko moko te. Ye nde apesi yo yango. Olóngobani na yango te. Okoki kosala eloko moko te mpo na kozua yango. Ye nde apesi yo yango. Olingi koyamba oyo Asalaki mpo na yo, mpo ókende na lífelo te?”

130 Alobaki: “Nakosala yango.” Alobaki: “Kasi soki nakoki bobele kotika makaya oyo.”

131 Nalobaki: “Makaya ekosila yango moko. Yo . . . Nazosenga yo te. Nazali moto ya mibeko te. Nandimaka ngolu. ‘Mpe baoyo nyonso Tata asili kopesa Ngai bakoya epai na Ngai.’” Nalobaki: “Soki ondimi yango na motema na yo mobimba!”

Alobaki: “Na motema na ngai mobimba, nandimi yango.”

<sup>132</sup> “Na bongo, okoyamba yango na mobókó wana, ete olóngobani na yango te, kasi Ye nde alóngobani? Komitala yo moko te; tala nde Ye, mpo yo okoki kosala eloko moko te mpo na yo moko. Tálá Ye oyo asalaki eloko moko mpo na yo. Olobi nini mpo Ye?”

“Oh,” alobaki, “Ye alóngobani.”

Nalobaki: “Ezali bongo, na bongo yambá oyo Ye apesi yo.”

Alobaki: “Nayambi yango.”

<sup>133</sup> Mpe nabatisaki ye na Nkombo na Yesu Klisto. Abimaki awa mpe apelisaki likaya.

<sup>134</sup> Eleki mwa bampóso, nazalaki na ndako na ye. Namonaki emononeli moko, mokolo moko na butu, ete bakátaki nzete moko oyo ezalaka ntango nyonso mobesu, mpe bakweisaki yango. Namonaki ete babétaki mabáya nsete likoló na yango. Libáya moko ya ndenge mosusu ezalaki pembeni na libaya oyo ya nsuka. Mpe na nsé ya libáya yango, pembeni na nsuka mpenza, eténgamaki *boye*, nzete yango ezalaki ya kobukana na esika wana. Mpe Mongongo moko elobaki: “Esengelaki kozala yo,” to, “Elingaki kozala yo.” Mpe Papa Cox akweyaki, atútanaki na mokongo *awa*. Na bongo, na ntongo oyo elandaki, bamemelaki ye makaya na ye, ntango azalaki na mbeto, mposa na yango esilaki kotika ye. Eleki mwa ba-mpóso! Amekaki lisusu ata likaya moko te, azali ata na mposa ya komela yango te, to eloko mosusu te. Bomoni? Mpe namonaki ye eleki mwa ntango, maboko na ye ekómaki mwa moindo, eleki mwa bampóso, mpo na makaya, sikawa azali ata kokoka te komona moko ézala zingazinga na ye. Tiá biloko ya liboso na esika ya liboso! Koluka kokóma malamu te; ozali mabe, mpo na kobanda, mpe okoki kosala eloko te. Ndelo ya bokabwani ezali, mpe bato nyonso bazali na ngámbo wana.

<sup>135</sup> Sikawa, ntango nabótamaki na mokili oyo, ezalaki na ekanganeli mosanto ya libala, kati na tata ná mama na ngai; líki moko ezalaki na libumu ya mama na ngai, cellule ya makila ezalaki ba-glande ya tata na ngai. Bomoi na ngai euti na cellule ya makila wana (na líki ya mama na ngai te), na cellule ya tata na ngai nde. Mpe ntango cellule ya makila yango ekotaki na esika esengeli mpo na kokutana ná líki, ntango ekutanaki, Nzambe apesaki motindo na bozalisi ete épesa ngai nzoto. Na ntango yango nde ngai nabótamaki na kati ya libota ya bato, mpe napésamaki libaku ya—ya kokóma moto ya mayele ndenge bato bazalaka, esika oyo nakokaki kokumba motuka, to nakokaki kosala makambo ndenge bato basálaka, kotambola, kosolola, kokúmba motuka, mpe bongo na bongo. Napesamelaki yango, mpo nabotamaki na kati ya libota ya bato, mpe napesamelaki nguya ya mayele mpo názala moto.

<sup>136</sup> Sikawa, ntango nabótamaki na libota ya Nzambe, nayáki na nzela ya Makila, Makila yango epesaki ngai Bomoi. Bongo,

nsima na ngai kokóma na bomoi kati na Klisto, Abatisaki ngai na Molimo Mosanto mpe nguya, mpo na kozala mwana na Nzambe. Sikawa, kaka ndenge nakoki kotambola, koloba lokola moto, kokúmba mótuka lokola moto, sikawa ntango nazui Molimo Mosanto, nazui nguya ya kobengana milimo mabe, ya koloba minoko na sika, koteya Nsango-malamu, kobikisa babeli. Nabátisami! Nabotami te; kasi nabátisami!

Bayáanganaki na eteni ya ndako ya likoló,  
Bango nyonso bazalaki kobondela na Nkombo  
na Ye,  
Babátisamaki na Molimo Mosanto,  
Mpe nguya mpo na mosala eyaki.

<sup>137</sup> Amen. Ondimi mpo na Bomoi na Seko, mpe obótami mbala mibale na nzela ya kondima na yo. Yesu alobaki, na Santu Yoane 5:24: “Ye oyo akoyoka Maloba na Ngai mpe akondima Ye oyo atindi Ngai, azali na bomoi ya seko,” Molimo Mosanto te, azali kaka na bomoi ya seko. Abótami na libota ya Nzambe. Na nsima, abátisami na Molimo Mosanto, na nguya ya mayele ya kondima, mpo ándima Nsango-malamu mpe átia Yango na mosala mpe ásala ete Ésala ndenge esengeli. Amen. Na bongo akomi kosala lokola mwana na Nzambe. Na bongo nde akoki kobengana milimo mabe. Yesu alobaki: “Bilembo oyo ekolanda bango!” Bomoni? “Na Nkombo na Ngai bakobengana milimo mabe, bakoloba minoko na sika, bakolokota ba-nyoka, bakomela biloko na kufa.” Bomoni, azui nguya na nzela na Molimo Mosanto, mpo na kosala makambo yango.

<sup>138</sup> Sikawa, ntango Akendeki, Alobaki: “Ezali na litomba ete Ngai nákende. Mpamba te, soki Nakei te, Molimo Mosanto akoya te.” Bomoni? Mpe ntango Akoya, Akondimisa mokili na lisumu, Akoteya boyengebene, mpe Akotalisa bino makambo oyo ekoya nsima (ezali mamono). “Akozua makambo oyo Ngai natei bino, mpe Akomónisa bino yango.” Maloba mpenza oyo Ayaki . . . Moto moko te akoki kosósola Liloba, libanda na libatizi ya Molimo Mosanto. Mpe soki moto alobi ete azali na libatizi ya Molimo Mosanto, mpe alobi ete Liloba ezali solo te, eloko moko ezali kotambola malamau te.

<sup>139</sup> Polo azalaki kotelemela Kondimana na Sika. Ezalaki te, Kondimana na Sika ekomamaki naino te. Polo azalaki kotelemela Boklisto, Saúlo. Kasi ntango azuaki Molimo Mosanto, alekisaki mibu misato na Azia mpo na koyekola Makomi, mpo ayékolaki na makolo ya Gamaliele, molakisi monene. Bongo ntango azóngaki, mibu zomi na minei nsima na yango, akendeki kokutana na Petelo na Yelusaleme, mpe amonaki ete bazalaki na Nsango-malamu moko, Liloba ná Liloba. Nzambe moko oyo asalaki ete Petelo átuya mokolo ya Pantekote mpe áyebisa bango ete bábóngola mitema mpe bábátisama na Nkombo na Yesu Klisto, Molimo Mosanto moko yango amonisaki likambo yango na Polo, mpe ayebisaki bango,

na Misala 19, nsima na bango kosíla kobátisama mbala moko na Yoane, alobaki: “Bosengeli kobátisama lisusu, na Nkombo na Yesu Klisto.” Bomoni?

<sup>140</sup> Bomoni, Molimo Mosanto akangamaka mpenza na Makomi. Kondima na Yango na likambo Yango efungolaka mabómbami nyonso. Amen. Biblia elobi, na Yoane 5:7: “Makambo misato etátolaka na Likoló: Tata, Liloba (elingi koloba Klisto), mpe Molimo Mosanto. Nyonso misato oyo ezali Moko.” “Mpe makambo misato etátolaka na mokili: mai, Makila, Molimo. Nyonso misato ezali moko te, kasi eyókanaka kati na moko.” Sikawa, okoki kozala na Tata te kozanga kozala na Mwana, okoki kozala na Mwana te kozanga kozala na Molimo Mosanto; Bazali Moko. Kasi okoki kosémbolisama kozanga kobulisama, mpe okoki kobúlisama kozanga kozala na Molimo Mosanto. Kobulisama ezalaka na nzela ya Makila, na nzela ya Makila nde Bomoi eyaka. Bomoni? Mpe Molimo Mosanto ezali nguya na Nzambe, bomoni, nguya oyo epesameli lingomba.

<sup>141</sup> “Bokozua” (nini?) “nguya,” Misala 1:8, “nsima na Molimo Mosanto yango koya likoló na bino. Bokozua nguya!” (Ezali te ete “bokobótama mbala mibale.”) “Bokozua nguya, nsima na Molimo Mosanto kokita likoló na bino. Na bongo bokokóma batátoli na Ngai na Yelusaleme, na Yuda, mpe na Samalia, kino na nsuka ya mokili mpenza.” Bomoni? Bokozua nguya, nsima na bino kozua Molimo Mosanto. Kasi bosengeli liboso kozua Molimo Mosanto, elingi koloba nguya na Nzambe, bomoni, mpo na kotalisa mpe komonisa polele. Bozali—bozali . . . ndenge ozalaki moto, mpe oyékolaki koloba, kotámbola mpe kosala makambo oyo moto asalaka; soki bobátisami na Molimo Mosanto, nguya ekopesamela bino mpo bókóma na bizaleli ya bana mibali mpe bana basi ya Nzambe. Kokamwa te ndenge bato bakómi kosala makambo mpe kosala lolenge oyo bazali kosala lelo, batóndisami ata moke te na Molimo Mosanto. Soki bátondisamaka, balingaki kosala bongo te. Balobaka ete bazali na Yango, kasi Yesu alobaki: “Bokoyeba bango na mbuma na bango.” Boye ndenge nini bokoki kosala bongo, bomoni, nyonso wana epalangani mpenza. Bomoni? Kasi bózonga na makambo yango mpenza!

<sup>142</sup> Sikawa, soki otambolaka sémba mpe olobaka ete ozali Moklisto, tobengisi yo na mésa ya Nkolo na mpokwa oyo. Lelo, na ntembe te, elambo eliami na ekólo mobimba, bamoko na lolenge moko mpe bamoko na lolenge mosusu. Kasi nakanisi ete lolenge malamu koleka ya kosala yango ezali kolanda Makomi, kaka ndenge basalaki yango na Makomi. Nakanisi ete ekokoka mpenza.

<sup>143</sup> Ozali na Biblia na yo, Ndeko Neville? Ndeko Neville akotánga sikawa Makomi.

[Ndeko Neville alobi: “Na mokapo ya 11 ya Bakolinti ya Liboso, kobanda na molongo ya 23:”—Mok.]

[*Mpo ete yango ezuaki ngai epai na Nkolo mpe epesaki ngai bino ezalaki ete, na butu wana ekabamaki ye, Nkolo Yesu akamati lípa:*]

[*Mpe esili ye kotonda, abuki yango, alobi ete, Bózua, bólia; oyo ezali nzoto na ngai mpo na bino: bósalaka boye mpo na ekaniseli na ngai.*]

[*Bobele bongo na kopo, sima na kolia, alobi ete, Kopo oyo ezali kondimana na sika kati na makila na ngai: bosalaka boye mbala na mbala ekomela bino yango mpo na ekaniseli na ngai.*]

[*Mpamba te mbala na mbala ekoliaka bino lipa oyo, mpe ekomelaka bino kopo, bozali kosakola kufa na Nkolo kino ekoya ye.*]

[*Boye soko nani akolia lipa soko akomela kopo na Nkolo na motindo mobongi te, azali na ekweli na ntina na nzoto mpe na makila na Nkolo.*]

[*Tika ete moto ámimeka mpenza mpe bongo ália lipa mpe ámela kopo.*]

[*Mpamba te ye oyo akoliaka mpe akomelaka, akomiliela mpe akomimelela ekweli, soko akososola nzoto na Nkolo te.*]

[*Yango wana mingi kati na bino bazali na bolembu mpe na maláli mpe bamosusu basili kokufa.*]

[*Soko nde tokomisosola, tokozua ekweli te.*]

[*Nde wana Nkolo akosambisa biso, tozali kozua etúmbu boye ete tókweisama esika moko na mokili te.*]

[“Nkolo ápambola litángi ya Liloba na Ye.”]

<sup>144</sup> Ezalaka ntango nyonso eloko moko ya bulee, eloko moko ya bosantu, nakanisi ete tosengeli kogumba mitó na biso sikawa mpe kobondela na kimia. Bino bóbondela mpo na ngai, ngai nakobondela mpo na bino. Tóbondela bamoko mpo na bamosusu, mpo Nzambe áyokela biso mawa, bikelamu bilóngobani te, oyo tolingi kosala molulu monene oyo mpo na kokanisa liwa ya Nkolo na biso.

<sup>145</sup> [Ndeko Branham apemi mpo na kobóndela na kimia. Maloba mazangi na bande—Mok.] Libondeli ya koyámbola oyo, topesi Yo yango, Tata na biso, na etumbelo na Yo ya wólo, ná Mbeka na biso, Nkolo Yesu. Tosengi yango na Nkombo na Ye. Amen.

<sup>146</sup> Sikawa nabanzi ete bampaka bakokende na esika na bango, mpe bako . . . ya lingomba, mpe bakobanda komema bato awa, wana bazali koya, molongo moko sima na mosusu, mpo na kolia elambo. Bókoba kokanisa loyembo oyo:

Molingami Mwana-mpate oyo akufaki, Makila  
 na Yo ya motuya  
 Ekobungisa nguya na yango ata moke te,  
 Kino Lingomba mobimba ya Nzambe oyo  
 esikolami  
 Ekobikisama, ete ésumuka lisusu te.

Togumba mitó.

<sup>147</sup> Tata ya ngolu mpe Mosantu, Jéhovah, oyo-na-Nguya-nyonso monene, tinda mapamboli na Yo likoló na bato na Yo, wana tozali kozela. Limbisa masumu na biso. Sikawa topesi na Yo molulu oyo, vinyo oyo, mbuma ya vinyo oyo elónámaki, mpe maboko ya batei oyo banikaki yango elongo. Ebongwanaki vinyo mpo na ntina oyo tomemeli Yo yango sikawa, mpo ékoka kotalisa, mpo na biso, Makila ya Nkolo na biso Yesu Klisto. Nabondeli Yo, Tata, ete óbulisa vinyo yango na ntina wana. Limbisa masumu na biso nyonso. Mpe tika ete moto nyonso oyo akomela vinyo oyo na nzoto na ye, tika ete ázala na nzoto kolongonu, makasi, mpe lobiko kouta na Yo. Sálá yango, Nkolo. Tosengi yango na Nkombo na Yesu. Amen.

<sup>148</sup> Biblia elobi ete ntango Abukaki lipa mpe Apámbolaki yango, Alobaki: “Bózua mpe bólia, oyo ezali Nzoto na Ngai oyo ebukani mpo na bino. Bósalaka boye mpo na kokanisa Ngai.” Mpe ntango tozali kolia biteni mike ya lipa, ya kasher yango, oyo esalemi kozanga fúlu, esalemi na Baklisto, esalemi mpo e—ezali kotalisa Nzoto ya Klisto. Tosósoli ete—ete bayekoli ya ntango ya Klisto, to ya ntango ya lingomba, nde bazuaki biteni yango mpe babongisaki bilei ya mpokwa, na bilei ya mpokwa ya nsuka, na bilei ya mpokwa ya nsuka ya Klisto. Mpe na ntango ya Biblia mobimba, bayekoli nde bazalaki kokabola biloko yango na bato. Mpe lelo, bayekoli na biso ya mikolo oyo, bandeko na biso ya losambo oyo, bayekoli ya Ntina oyo, nde bakokabola biloko yango na bato. Mpe bakoza biteni yango mpe bakopesa yango na bato.


<sup>149</sup> Sikawa, ntango ozui lipa oyo, mikanisela, ezali kotalisa Mwana-mpate. Eleki mibu mingi, ntango mwana-mpate ya Yisraele etumbamaki likoló na móto, mpe eliamaki ná matiti ya bololo, bato bazuaki makasi; Ba-sapáto na bango ebébaki te, bilamba na bango enzulukaki te, na mobembo mobimba, kino ntango bakómaki na mboka ya elaka. Tika ete Nzambe ábatela biso na nzoto kolongonu, na esengo, kosaleláká Ye kino ntango tokokóma na Mboka ya Elaka oyo Asili kopesa biso.

Tóbondela.

<sup>150</sup> Tata na Ngolu ya Likoló, wana nauti koloba na mpokwa oyo na ntina na Nzoto ya Nkolo na biso oyo ya Bulee, oyo ebulisamaki, oyo litondi ya Bonzambe efandaki kati na Ye, ntango nakanisi Nzoto yango ndenge enyokwamaki mpe—mpe etútamaki, mpe Makila ezalaki kotanga, mokongo na Ye ná

mipanzi na Ye ekómaki kongenga mpo na ba-fimbo oyo bazalaki kobeta na mokongo na Ye mobimba, ntango nakanisaka ete lípa oyo etútami mpe efinani ezali kotalisa yango, ezongisaka likambo yango sika na mitema na biso, tokitisi mitema na biso, Nkolo, likoló na etumbelo na Yo na mpokwa oyo. Limbisa biso, E Nzambe. Mpe tika ete lípa oyo ebukani, wana ezali kokóta na minoko na bango, basali na Yo, tika ete básosola ete Nzoto na Yo ya motuya nde etútamaki mpe ezokisamaki, mpe na mapipi yango nde biso tobikisami. Sálá yango, Nkolo. Búlisa lipa kasher oyo mpo ékokisa ntina na yango. Tosengi yango na Nkombo na Yesu. Amen.

Bózela mwa moke.

<sup>151</sup> Elambo yango ezali kaka mpo na biso moko te. Mondimi nyonso oyo azali Moklisto akoki koya na mésa na Nkolo, mpo na kolia elambo oyo elongo na biso...?... 

62-1007 Fungóla Ya Ekuke  
Branham Tabernacle  
Jeffersonville, Indiana U.S.A.

LINGALA

©2025 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)